

ዮሐንስም ያኦሲ ፔጋሲ ዳዌ ባኮ ዓይያ ካሮ"

ዮሐንስም ያኦሲ ፔጋሲ ዳዌ ባኮ ፃኣፒንቴሢ ኪሪሰቶሴ ጉሙርቃዘንሢ፡ ዬሱስ ኪሪሰቶሴ ፔኤኮ ጎዳ ማሂ ሃሣ ያኦሲም ዲማዴያ ማዒ ናጋሢረ ዒዲንቴ ዳኪንቴ፤ ዔያታ ሜታዳ ዎዶ"ናኬ፤ ፃኣፒ ዓሢኮ ዴኤፖ ማሊፃ' ናባባ ዓሶኮ ሃጊ ማዓንዳ ዎዛ" ጎኔ ዎዛ ማዓንዳጉዲ ዶዲሻኒና ዔያቶ ሄሌ" ዒዲንቴ ዳኪንቴያ ሜታሢዳ ዔያታ ያኦሲ ጉሙርቂያና ዶዳንዳጉዲኬ።

ማፃኣፔሎኮ ባሼሢ፡ ሚርጌ ሃሣ ዎሊ ሄሊ" ሄሊ" ዓኣ ባካ ዮሐንስም ያኦሲ ፔጋሲ ዳዌ ባኮ ኬኤዛያ ማዓዛ ዬንሢ፤ ዮሐንስም ያኦሲ ፔጋሲ ዳዌ ባኮንሢ ዬኖ ዎዶ"ና ዓኣ ኪሪሰቶሴ ጉሙርቃ ዓሶ ማኣዲ"ኒ ዳንዳዓያ፤ ሜሌ" ዓሶም ጋዓንቴ ዓኣሺንቴ ባኣዚ" ማዒ ማሊሲ ጌስቶናያኬ። ዓይኑሞኮ ላሚ ላሚ ጌይንታ ማሊያጉዲ ሐና" ማፃኣፖኮ ጌሊያ ካራ" ካራ" ጉቤ ዲማ ዲማ ያኦሲ ዮሐንስም ፔጋሲ ዳዌ ባካ ዲማ ዲማ ጎይሢና ላሚ ላሚ ኬኤዚንቴኔ፤ ማፃኣፔሎኮ ቡሊ"ያይዳ ዲማ ዲማ ማሊሢ ዓኣያታቴያ ዴኤፖ ማሊፃ ጋዓንቴ ዔርቴያኬ፤ ዬይያ «ጎዳ ማዔ፤ ኪሪሰቶሴ ዛሎ"ና ያኦሲ ላሚሱዎ ጎይሢ ፔቴ"ና ፃላሂንታ ቃሲ" ሜሌ" ሞርኮዎ ቢያ ባሻንዳኔ፤ ዒ ባሼ ዎዶ"ና ዒዛም ጉሙርቂንታያ ማዔ፤ ዒጊኖንሢም ዓኪ ጫሪንቲና ዓኪ ሳዓናኮ ዓንጃ ዔያቶም ዒንጋንዳኔ» ጋዓያኬ።

ማፃኣፔላ ዲማ ዲማ ዓርቄ ባኮ

ዓይያ ካሮ" 1፡1-8

ለንካዎ ሺኢጲያ ማኣሮም ዳኪንቴ ኪኢቶ" 1፡9—3፡22

ለንካዎ ዔርዛ ማላቶና ማሪንቴ ማፃኣፖ 4፡1—8፡1

ለንካዎ ዛያሢ ዛሎ" 8፡2—11፡19

ዴኤፖ ሾኦዣሢና ላምያ ቦያንሢና ዛሎ" 12፡1—13፡18

ያኦሲ ዮሐንስም ፔጋሲ ዳዌ ዲማ ዲማ ባኮ 14፡1—15፡8

ለንካዎ ያኦሲኮ ጎሪ"ንቶ ዑዢ 16፡1-21

ባብሎኔኮ ባይሲንቶ፤ ሃሣ ቦያንታ ሉኡዙሞና ያኦሲ ማሊያ

ኬኤዛያ ማላ ዓሶንታ ፃላሂንታኮ ባሼንቴያ 17፡1—20፡10

ጋፒንያ ዎጎ 20፡11-15

ዓኮ ጫሪንጮንታ ዓኮ ሳያንታ ዓኮ ዬሩሳሌሜ ካታሜሎንታ ዛሎ"

21፡1—22፡5

ጋፒንሢ ማሊሢ 22፡6-21

1 ሐይ የሐኪሴም ያኦሲ ፔጋሲ ዳዌ ባካ፡- ዑኬ ማዓንዳ ባኮ ያኦሲ ፔኤም ማዳዞንሢም ዳዋንዳጉዲ ዩሱስ ኪሪስቶሴም ዳዌያኬ፤ ዩሱስ ኪሪስቶሴም ፔ ከኢታንቻሢ ዳኪ ዒዛም ማዳ የሐኪሴም ሃያ ባኮ ፔጋሲ ዳዌ። 2 የሐኪሴም ያኦሲ ቃኦሎ"ና ዩሱስ ኪሪስቶሴ ማርካዴ ባኮ ዛሎ" ቢያ፤ ሐሣ ዒ ዛጌ ባኮዋ ቢያ ፔኤሮ ማርካዲ ኬኤዜ። 3 ዩይ ቢያ ማዓንዳሢ ዑኬ ዋይይዳታሢሮ ሃኖ" ያኦሲ ማሊያ ኬኤዛ ማፃኦፖ ናባባ ዓሢ ዓንጅ ዋዛ ዴንቃንዳ፤ ዩያጉዲ ኬኤዚንቴ ያኦሲ ማሊያ ዋይዛዞንሢና ፃኦፒንቴሢ ኩንሣሢ ቢያ ዓንጅ ዋዛ ዴንቃንዳ።

ዒሲያ ዓጮ" ዓኣ ላንካዋ ሺኢጲያ ማኦሮንሢም ዳኪንቴ ሳራሥሢ

4-5 ዒሲያይዳ ዓኣ፡ ላንካዋ ሺኢጲያ ማኦሮ ዓሶም የሐኪሴይዳፓ ዳኪንቴ ሳራሥሢ፡-

ሐሢ ዓኣሢ፡ ሚናፓ ናንጋሢና ሃጊ ሙካንዳ ያኦሲዳፓ፡ ያኦሲ ካኦቱዋ ያይቶ ቤርታ ዓኣ ላንካዋ ዓያኖንሢዳፓ፤ ሃሣ ጉሙርቂንታያ ማዔሢዳፓ፡ ሐይቢፓ ዔቂዖና ኮይሪ ማዔሢዳፓ፡ ዓጮ" ካኦቶ" ዋይሣያ ማዔ፡ ዩሱስ ኪሪስቶሴይዳፓ ኮሹዋና ዋዛና ዒንሢም ማዖንጎ።

ኦና ሸከሢሢም፡ ፔ ሱጉዖና ሻንቂ ጎማፓ ኦና ጌኤሺሢም፡ 6 ዒዛኮ ዓዳሢ ማዔ፡ ያኦዛሢም ኦኦኒ ቄኤሴ ማዒ ማዳንዳጉዲ ካኦቱዋ ኦም ዒንጌ፡ ዩሱስ ኪሪስቶሴም ቦንቾና ዋልቄና ናንጌና ማዖንጎ፤ ዓኣሜን።

7 ዒዚ ሻኦሬና ሙካንዳ፤

ዒዛ ጮርጌ ዓሳኣ ዓቱዋዖ ዓሲ ቢያ ዒዛ ዛጋንዳ፤

ሳዖይዳ ዓኣ ዴራ" ቢያ ዒዛ ዛሎ"ና ዩኤካንዳ፤

ሂዮ! ዩይ ባካ ቢያ ጎኔ ማዓንዳ፤ ዓኣሜን።

8 «ሐሢ ዓኣሢንታ ሚናፓ ናንጋሢ ሃሣ ሐጊያ ሙካንዳሢ፡ ቢያ ባኦዚ" ዳንዳዓ ጎዳ ማዔ ያኦሲ ዔኤቢ ቢያ ዓርቃሢና ጋፒሳሢና ታናኬ» ጋዓ።

ኪሪስቶሴኮ ፔጋዲ ጴዲያ

9 ታኦኒ ዒንሢኮ ዒሻሢ ማዔሢ፡ ዒንሢና ዋላ" ኪሪስቶሴኮ ሜታሢና ዓኣ ካኦቱዋና ሃሣ ጊቢ" ዳንዳዒዖና ዴንቃያ ማዔ፡

1:4-5 ኬሲ. ማፃ 3:14፤ የሐ. ያፔዳ 4:5። 1:4-5 ዒሲ. 55:4፤ ዓይኑ. 89:27።

1:6 ኬሲ. ማፃ 19:6፤ የሐ. ያፔዳ 5:10። 1:7 ዳኦኢ. 7:13፤ ማቲ. 24:30፤

ማር. 13:26፤ ሉቃ. 21:27፤ 1ቴሲ. 4:17፤ ዛካ. 12:10፤ የሐ. 19:34። 1:8 የሐ.

ያፔዳ 22:13፤ ኬሲ. ማፃ 3:14።

የሐኪሴም የኦሲ ቃኦሎ"ና ዬሱሴ ዛሎ"ናሮ ማርካዳሢሮ ፒዳሞ ጌይንታ ዋኦያ ሳዛ" ዓኣ ዓጩሎይዳ ቱኡቲ ዓኣዎ፡- 10 ጎዳ ከሎ"ና* ዓያና ጌኤሺኮ ዋልቆ ጋሮ ጌሊ ታ ዓኣንቱ ዛዬ ዐኡሲጉዳ ዴኤፒ ዐኡሲ ታኣኮ ጊንሢና፡- 11 «ኔ ዛጋ ባኮ ማፃኣፔይዳ ፃኣፒ ላንካዎ ሺኢጲዎ ማኣሮም ጌይፃ፡- ዓፕሶኔም፡ ሴሜርኔሴም፡ ጴርጋሞኔም፡ ቲያዒሮኔም፡ ሴርዴሴም፡ ፒላዴልፒያና ሎዶቂያናም ዳኬ» ጋዓንቱ ታ ዋይዜኔ።

12 ዬያ ታኣም ያ ከኤዛቲያ ዔራኒ ጊንሢም ታ ሺሬኔ፤ ዬማና ላንካይ ዋርቁፓ ኮሾ"ና ፖሊ ጌሦ ሻርና ታ ዴንቄኔ፤ 13 ዬንሢ ሻርና ባኣካ" ዓሲ ናዓሢ ማላ ዓሲ ታ ዴንቄኔ፤ ዒዚያ ቶኮ ሄላ" ያዶሲ ማኣዎ ማይንቲያ፡ ዳዶ"ይዳ ዋርቁይዳፓ ኮሺ"ንቱ ቃልሾ ቱኪ" ዓኣኔ። 14 ዒዛኮ ቶኦኮ"ንታ ቶኦኮ" ጋፓኖንታ ቦኦሬ ማራይ ጋፓኔጉዴያ ሃሣ ሻቺጉዲ ቦኦሬኬ፤ ዓኣፓኣ ዔኤታ ታሚጉዲኬ፤

15 ቶካ ጊንሣ ታሚዳ ዓጊ፡ ጌልፒ ዘቂሶና ዓንጊ ማላያኬ፤ ዐኡዛ ሃሣ ዴኤፒ ሶኦሪንታ ዋኣሢ ጉኡማያጉዲኬ። 16 ሚዛቆ ከጮይዳ ዒዚ ላንካይ ዠኦጌ ዓርቂ ዓኣኔ፤ ዳንጋፓ ዒዛኮ ቢያ ዛላ" ዓጩ ማዔ፡ ጩንቻ ዓፓሮ ከሰካኔ፤ ሃሣ ዒዛኮ ዓኣፖ ካራ" ሚርጌና ፖዓ ዓቢጉዲ ፖዓያኬ። 17 ዬያ ታ ዛጋያ ዶሊንቲ፡ ቶኮ ዴማ" ዒዛኮ ሎኦማዛ ዒዚ ጋዓንቱ ሚዛቆ ከጮ ታ ዐፃ ጌሣዎ፡- «ዒጊጨፖ፤ ዔኤቢ ቢያ ዓርቃሢና ጋፒሳሢና ታናኬ፤ 18 ሺምፔና ታ ናንጋያኬ፤ ሓያኮ ቤርታ ታ ሓይቄኔ፤ ጋዓንቱ ሓይሾ ታኣኒ ናንጊና ሓይቁዎ ናንጋያ ማዔኔ፤ ሓይቢና ሓይቄ ዓሳ ዴዓ ቤዘናይዳ ቢታንቶ ታኣኮ ዓኣኔ» ታኣም ጌዔኔ። 19 ሓሣ ዒ ከኤዛዎ፡- «ዓካሪ ኔ ዛጌሢና ሃሢ ዓኣ ባኮና ሃጊ ማዲንታንዳ ባኮና ፃኣፔ፤ 20 ታኣኮ ሚዛቆ ከጮ ኔ ዛጌ፡ ላንካዎ ዠኦጎንሢና ፖያ ጌሦ ላንካዎ ዋርቆ ሻርኖንሢኮ ዓኣሺንቱ ማሊፃ ያዲኬ፤ ላንካዎ ዠኦጎንሢ፡- ላንካዎ ሺኢጲዎ ማኣሮኮ ከኢታንቸኬ፤ ላንካዎ ፖያ ጌሦ ሻርኖንሢ፡- ላንካዎ ሺኢጲዎ ማኣሮኬ» ጌዔኔ።

2

ዓፕሶኔ ሺኢጲዎ ማኣሮም ከኤዛንቱ ባኣዚ"

* 1:10 ጎዳ ከሎ"ና፡- ጌይፃ ጎዳ ሓይባ"ፓ ዔቄ ከሎ"ኬ፤ ሃሣ ከሪሰቶሴ ጉሙርቃ ዓሳኣ ካኣኮ ካኣሸካ ከሎ"ኬ። 1:13 ዳኣኔ. 7፡13፤ 10፡5። 1:14 ዳኣኔ. 7፡9፤ 10፡6። 1:15 ሂዚ. 1፡24፤ 43፡2። 1:17 ዒሲ. 44፡6፤ 48፡12፤ የሓ. ያፔዳ 2፡8፤ 22፡13።

1 ሐሣ ከኤዛዎ፡- «ዔፕሶኔ ሺኢጲያ ማኣር ከኢታንቻሢም ሂዚ ጌይ ፃኣፔ፤

«ሐይ፡ ላንካዎ ዠኦጋሢ ፔኤኮ ሚዛቆ ኩጫ ዓርቄሢና ላንካዎ ዋርቆ ሻርኖ ባኣኮ"ይዳ ሃንታ ዓሢ ከኤዜያኬ፤ 2 ኔኤኮ ማዶ"፤ ዶዲ ኔ ማዶ ማዶ" ሃሣ ገቢ" ዳንዳዒዎዎ ታ ኔኤሲ" ዔራኔ፤ ፑርቶ ዓሶ ዛገ ኔ ዚቲ ጌይባኣሢ፤ ሃሣ ያኦሲ ማዶ"ም ዳከንቲባኣያታዎ ሓ ዳከንቲያኬ» ፔና ጋዓዞንሢ ዛገ ዱማሲ ሉኡዚ ዔያታ ማዔሢ ኔ ዔሬሢያ ታ ዔራኔ። 3 ዩያጉዲ ገቢ" ዳንዳዒ፤ ኔኤኮ ዶዲያና ታ ሱንዖር ቤልፃዱዎ ዶዲ ሜታሢ ኔ ዔከሢ ታ ዔራኔ። 4 ጋዓንቲ ፔቲ" ታ ኔኤኮ ቦሃ ባኣዚ" ዓኣኔ፤ ዬና ዓይጎዳይ ጌዔቲ ኔኤኮ ቤርታኣ ናሹዎ ኔ ሃሹ"ኔ፤ 5 ዓካሪ ኔ ሓኣዒ ሎኦማንዳሢኮ ቤርታ ዋካ ኔ ዓኣቲያ ማሊ ጳቂሢ፤ ጎዎዎ ኔኤኮ ቡኡፃ፤ ቤርታ ማዶሢጉዲ ማዶ፤ ዩያ ቢያ ኔ ማዶባኣቲ ታ ኔ ኮይላ" ሙካንዳኔ፤ ጎዎዎ ኔ ቡኡፃባኣቲ ፖዎ ጌሦ ሻርኖ ቤዛፓ ታ ኔኤኮ ሺኢሻንዳኔ። 6 ጋዓንቲ ታ ኔና ሄርሻ ፔቲ" ባኣዚ" ዓኣኔ፤ ዬና፡ ታኣኒ ዒፃ፤ ኒቆላ ዓሶኮ ማዶ" ኔኤኒያ ዒፃሢ።

7 «ሺኢጲያ ማኣር ዓሶም ዓያና" ጋዓ ባኮ ዋይዛ ዋይዚ ዓኣሢ ዋይዞንጎ! ያሎና ባሺሢ፡ ያኦሲ ኮሺ"፤ ኮዠ ቤዛ ዓኣ ሺምፖ ዒንጋ ሚፃሢ ዓኣፖ ታ ሙኡዛንዳኔ።»

ሴሜርኔሴ ሺኢጲያ ማኣርም ከኤዚንቲ ባኣዚ"

8 ሃሣ ዒዚ ከኤዛዎ፡- «ሴሜርኔሴ ሺኢጲያ ማኣር ከኢታንቻሢም ሂዚ ጌዒ ፃኣፔ፤

«ሐይ፡ ዓይፃሢና ጋፒንፃሢና ማዔያ ሃሣ ሃይቁዎ ሺምፖና ዓኣያ ማዔሢ ከኤዜያኬ፤ 9 ኔኤኮ ሜታሢና ማንቃቶና ታ ዔራኔ፤ ያዲ ማዔቲያ ኔ ዖርጎቺኬ፤ ዓይሁዴ ዓሲቱዎ ሓ ዓይሁዴኬ» ፔና ጋዓ ዓሶንታ ፃላሄ ዓሲ ማዔ ዓሶንታ ሱንዖ ኔኤኮ ፑርቲሳሢ ታ ዔራኔ፤ 10 ኔና ሄላ"ንዳ ሜታሢ ዒገጨፖ፤ ሓኣዛጉዎቲ፡ ፃላሄ ዒንሢ ዋይታቲያ ዛገኒ ዒንሢዳፓ ፔቲ" ፔቲ" ዓሶ ቱኡሲ ማኣሪ ጌልዚ ቱከ"ሴም፡ ታጳ ከሊ" ዒንሢ ሜታዳንዳኔ፤ ጋዓንቲ ሓይቢ ሄላ"ንዳኣና ጉሙርቂንታያ ማዔ፤ ቦንቺ ዒንጎ ባኣዚ" ማሂ ዒንገንታ ናንጎ ታ ኔኤም ዒንጋንዳኔ።

11 «ሺኢጲያ ማኣርም ዓያና" ጋዓ ባኮ ዋይዛ ዋይዚ ዓኣሢ ዋይዞንጎ! ያሎና ባሺሢ፡ ላምዓሳ ሓይባ" ዎኦታንዳ ባኣዚ" ባኣሴ» ጌዔኔ።

ጴርጋሞኔ ሺኢጲያ ማኦሮሞ ኬኤዚንቴ ባኣዚ"

12 ሐሣ ዒ ኬኤዚያ:- «ጴርጋሞኔ ሺኢጲያ ማኦሮ ከኢታንቻሣሞ ሂዚ ጌዒ ፃኣፔ፤

«ሐይ: ላምዖ ዛላ" ዋርቁንቴ ጨንቾ ዓፓሮ ዓርቁሣ ኬኤዚያኬ፤
13 ኔኤኒ ፃላሄኮ ካኣቱሞ ያይታ" ዓኣ ቤዛ ዓኣሣ ታ ዔራኔ፤ ያዲ ማዔቴያ ታ ሱንያ ዶዲ ኔ ዓርቁኔ፤ ካኣኩዋ ኔ ሃሺ"ባኣሴ፤ ሃሣ ታኣኮ ጉሙርቁንታ ማርካ ማዔ ዓንቲጸሴ ዬያ ፃላሄ ካኣታዴ፡ ዒንሣ ካታማ ዋዲንቴ ዋዶ"ናታያ ኔ ታና ጉሙርቁያ ሃሺ"ባኣሴ፡ 14 ያዲ ማዔቴያ ታ ኔኤኮ ቦሃ ፔቴ" ፔቴ" ባኣዚ" ዓኣኔ፤ ዬና ዓይጎዳይ ጌዔቴ ባኣላኣሜ ጎሮሣኮ ዔርዚያ ዓርቁ ፔቴ" ፔቴ" ዓሲ ዒንሣ ባኣካ" ዓኣኔ፤ ዬይ ባኣላኣሜ ዒሰራዔኤሌ ዴራ" ሜሌ" ካኣሺም ሹኪንቴ ዓሽኮ ሙዓንዳጉዲና ማቾ ሃሣ ዓኒ ማዒባኣያና ላሂ፡ ዳቢንታንዳጉዲ ማሆም ጌዒ ባኣላኣቁ ጎሮሣ ዒ ዘሬ ዘሮ"ኬ፡ 15 ዬያጉዲ ሃሣ ኒቆላ ዓሶኮ ዔርዚያ ዓርቁ ዓሲያ ዒንሣ ባኣካ" ዓኣኔ፤ 16 ዬያሮ ጎሞ ኔኤኮ ቡኡፃ! ሃንጎ ዑኬና ታ ኔ ኮይላ" ሙከ፡ ታ ዳንጋፓ ኬሰካ ጨንቾ ዓፓሮና ታ ዔያቶ ጫርጋንዳኔ፡፡

17 «ሺኢጲያ ማኦሮሞ ዓያና" ጋዓ ባኮ ዋይዛ ዋይዚ ዓኣሣ ዋይዘንጎ! ያሎና ባሽሣሞ ዓኣቹ ጌሦና፡ ማና" ጌይንታ ሙዖ ታ ዒንጋንዳኔ፤ ሃሣ ጌንሣ ዓከ ሱንሣ ጌዳ" ፃኣፒንቴ፡ ቦኣሬ ሹቹ ታ ዒዛም ዒንጋንዳኔ፤ ዬና ዔኬ ዓሣዳፓ ዓታዛ ሜሌ" ያኦኒያ ዬና ሱንፃሎ ዔራንዳያ ባኣሴ» ጌዔኔ፡፡

ቲያዒሮኔ ሺኢጲያ ማኦሮሞ ኬኤዚንቴ ባኣዚ"

18 ሐሣ ዒ ኬኤዚያ:- «ቲያዒሮኔ ሺኢጲያ ማኦሮ ከኢታንቻሣሞ ሂዚ ጌዒ ፃኣፔ፤

«ሐይ: ዔኤታ" ታሚ ማላ ዓኣፒ ዓኣያ፤ ሃሣ ታሚዳ ዓጊ፡ ጌልፒ ዘቂሶና ዓንጊ ማላ ቶኪ ዓኣ፡ ያኦሲ ናዓሣ ኬኤዚያኬ፤
19 ታ ኔኤኮ ማዶ"፡ ናሹሞ፡ ጉሙርቁያ ሃሣ ኔኤኒ ዔኤዒ ማዳ ማዶ"ንታ ጌቢ" ዳንዳዒ ዶዲያንታ ዔራኔ፤ ቤርታኣሰካፓ ሃሣ ኔ ባሽ ማዳሣያ ታ ዔራኔ፡፡ 20 ጋዓንቴ ፔቴ" ታ ኔኤኮ ቦሃ ባኣዚ" ዓኣኔ፤ ዬና:- «ያኦሲ ማላሣ ታ ኬኤዚያኬ» ጋዓ ላኣሌሎ፡ ዔልዛቤሎኮ ማዶ" ኔ ዛጊ ዚቲ ጌዔኔ፤ ዒዛ ጋዓንቴ ታኣም ማዳ ዓሳ ማቾ ሃሣ ዓኒ ማዒባኣያና ላሃንዳጉዲና ሜሌ" ካኣሺም ሹኪንቴ ዓሽኮ ሙዓንዳጉዲ ዔርዚሣና ዓሶ ዳቢሼኔ፡፡ 21 ዒዛ ጎሞ ፔኤኮ

2:14 ፓይ. ማፃ 22፡5፤ 7፤ 31፡16፤ ላሚ. ዋማ 23፡4፤ ፓይ. ማፃ 25፡1-3፡፡ 2:17 ኬሲ. ማፃ 16፡14-15፤ 16፡33-34፤ ዮሐ. 6፡48-50፤ ዒሲ. 62፡2፤ 65፡15፡፡ 2:20 1ካኣቶ". ማ 16፡31፤ 2ካኣቶ". ማ 9፡22፤ 30፡፡

ቡኡፃንዳጉዲ ቤሲ ታ ዒዞም ጌሄኔ፤ ዒዛ ጋዓንቴ ጎሞ ፔኤሲ" ቡኡፃኒ ኮይባኣሴ።²² ዬያሮ ሃርጊሺ ታ ዒዞ ላይሣንዳኔ፤ ዒዞና ዋላ" ማዴ ፑርቶ ማዴ" ቡኡፃ ሃሺ"ባኣቴ ዒዞና ዋላ" ላሄ ዓሶ ቢያሢዳ ዴኤፒ ሜቶ ታ ዒኪ ዬዓንዳኔ፤²³ ዒዞና ዋላ" ዬያ ማዴ ዓሶ ታ ዋዳንዳኔ፤ ሺኢጲያ ማኣሮ ዓሳ ቢያ ዓሲኮ ዒኔ ማሊሢ ጋፒሲ ዛጊ ታኣኒ ዒራያ ማዕሢ ዒራንዳኔ፤ ዒንሢ ፔቴ" ፔቴ"ሢም ዒንሢኮ ማዴ" ጎይቻ ታ ዒንጋንዳኔ።

²⁴ «ዒንሢ፡ ቲያዲሮኔይዳ ዓኣያታዎ ሓያ ፑርቶ ዔርዚያ ዒኪ ባኣዘንሢም ቢያ ዬያጉዲ ፔቴ" ፔቴ"ዘንሢ ፃላሄኮ ሃይ ዓኣሺንቴ ማሊሢኬ» ጋዓ ማሊያይዳ ጌሊባኣዘንሢም፡ ሜሌ" ዴኤሢ ዓይሥሢ ታ ዒንሢም ዓይሣዓኬ፤²⁵ ጋዓንቴ ታኣኒ ሙካዳንያ ሄላ"ንዳኣና ዒንሢኮ ዓኣ ጉሙርቂያ ዶዲሺ ዓርቁዋቴ ታ ጋዓ።²⁶ ያሎና ባሺሢና ታኣኮ ማዴ" ጋፒንሢ ሄሊ"ሲ ዶዲ ማዴሢም ሜሌ" ዴሮ" ዑፃ ቢታንቶ ታ ዒንጋንዳኔ፤

²⁷ «ዒዚ ዔያቶ ሄርቁ ዋይሣንዳኔ፤

ዓጨና ማዞና ሜሄጉዲ ዋዲ ዒ ጋኣጫንዳኔ»
ዬይ ቢታንታ ታኣኒ ታ ዓዶይዳፓ ዔኬ ጎይቻዬያኬ፤

²⁸ «ዒ ባሻያ ማዒያ ዔርዛኒ ካሪያ ዞኦጎ ታ ዒዞም ዒንጋንዳኔ።

²⁹ «ሺኢጲያ ማኣሮም ዓያና" ጋዓ ባኮ ዋይዛ ዋይዚ ዓኣሢ ዋይዘንጎ!» ጌዔኔ።

3

ሴርዴሴ ሺኢጲያ ማኣሮም ኬኤዚንቴ ባኣዚ"

¹ ሓሣ ዒ ኬኤዘያ፡- «ሴርዴሴ ሺኢጲያ ማኣሮ ከኢታንቻሢም ሄዚ ጌዒ ፃኣፔ፤

«ሓይ፡ ያኦሲኮ ላንካዎ ዓያኖንሢና ላንካዎ ዞኦጎንሢ ኩጫ ዓርቁሢ ኬኤዜያኬ፤ ማዴ" ታ ኔኤኮ ዔራኔ፤ ሱንያና ኔኤኒ ዋሊ"ኬ፤ ጋዓንቴ ኔ ሓይቁያኬ።² ዬያሮ ጴጮ! ኔኤኮ ማዴ" ታ ያኦዛሢ ቤርታ ፒዜ ማዕም ታ ዴንቁባኣሢሮ ሓይቃኒ ዑኪ ዓኣ፡ ዓቴ" ባኮ ኔኤኮ ዶዲሺ።³ ዓካሪ፡ ቤርታ ኔ ዋዚጉዴ ዔራቶ ዔኬያታቶዎ ሃሣ ዋይዜያታቶዎ ማሊ ጸቂሢ ካፔ፤ ጎሞዎ ኔኤኮ ቡኡፃ፤ ጋዓንቴ ኔ ጴጪባኣያ ማዕቴ ዉሲጉዲ፡ ኔ ዔራዋንቴ ታ ሙካንዳኣኬ፤ የማ ዋዴ ታ ሙካንዳቴያ ኔ ዔራዓኬ።⁴ ጋዓንቴ ፔኤኮ ማኣዓሢ ከንቂሲባኣ፡ ዳካ" ዳካ" ዓሲ ኔኤና ዋላ" ሴርዴሴይዳ ዓኣኔ፤ ታኣና ዋላ" ዔያታ ዓኣዳንዳያ ኮይሳያታሢሮ ቦኦሬ ማኣየ

ማይንቲ ታኣና ዋላ" ዓኣዳንዳኔ። 5 ያሎና ባሽህሂ' ዔያቶጉዲ ቦኦሬ ዓፒላ ማይንታንዳኔ፤ ሱንያ ዒዛኮ ታኣኒ ታ ዓደና ኪኢታንቸናም ዔርዛንዳኔ፤ ናንጊና ናንጋ ዓሶኮ ሱንያ ፃኣፒንቲ ዓኣ፡ ናንጎ ማፃኣፖይዳፓ ሱንያ ታ ዒዛኮ ባይዛዓኬ።

6 «ሺኢጲያ ማኣሮም ዓያና" ጋዓ ባኮ ዋይዛ ዋይዚ ዓኣህሂ ዋይዘንጎ!» ጌዔኔ።

ፒላዴልፒያ ሺኢጲያ ማኣሮም ኬኤዚንቲ ባኣዚ"

7 ሐህሂ ኬኤዛዎ፡- «ፒላዴልፒያ ሺኢጲያ ማኣሮ ኪኢታንቸህሂም ሂዚ ጌዒ ፃኣፔ፤

«ሐይ፡ ያኦሲም ዲማዴያ ሃህሂ ጎኔ ማዔ፡ ካኣቲ ዳውቲ ቁልፖ ኩጫ ዓርቁህ ኬኤዜያኬ፤ ዒዚ ቡሉ"ህሂ ያኦኒያ ዋዲዋሴ፤ ዒዚ ዋዴህ ያኦኒያ ቡሉ"ዋሴ። 8 ማዶ" ታ ኔኤኮ ዔራኔ፤ ሐይሹ፡ ያኦኒያ ዋዲኒ ዳንዳዑዋ ቡሉ"ንቲ ካራ ታ ኔ ቤርታ ጌህኔ፤ ዋልቃ ኔኤኮ ዳካ" ማዔህ ታ ዔራኔ፤ ማዔቲያ ታ ቃኣሎ" ኔ ካፔኔ፤ ታ ሱንያዋ ኔ <ዔራዋሴ> ጌይ ሃሺ"ባኣሴ። 9 ዓካሪ፡ ዓይሁዴ ማዒባኣያ <ኦ ዓይሁዴኬ> ጋዓ ዓሶና ፃላሄ ዓሲ ማዔዘንህና ሃህሂ ሉኡቃዘንህሂ ሙኪ ኔ ቶኮ ዴማ" ሎኦሚ ኔኤም ዚጋንዳጉዲ ታ ማሃንዳኔ፤ ታ ኔና ናሽካያታህሂ ዔያቶ ታ ዔርዛንዳኔ። 10 <ጊቢ" ዳንዳቲያ ማዔ> ታ ኔኤም ጌዔህ ኔ ካፔሂሮ ሳይደ ናንጋ ዓሳ ዋይታቲያ ዛጋኒ ጌዒ ዓጮ" ቢያይዳ ሙካንዳ ሜታህዳፓ ታ ኔና ካፓንዳኔ። 11 ታኣኒ ዑኬና ሙካንዳኔ፤ ቦንቺ ኔኤም ዒንጎ ባኮ ያኦኒያ ኔኤሲ" ዔኩዋጉዲ ኔኤኮ ዓኣ ባኮ ዶዲሺ ዓርቁ። 12 ያሎና ባሽህሂ፡ ታ ያኦዛሂኮ ጌኤዢ" ማኣሮይዳ ቱርቱር ታ ማሃንዳኔ፤ ዬካፓ ዒ ዓጊፃዓኬ፤ ታ ያኦዛሂኮ ሱንያንታ ታ ያኦዛሂኮ ካታዋ ሱንያንታ ዒዛይዳ ታ ፃኣፓንዳኔ፤ ዬና ካታሚላ ጫሪንጮ፡ ታ ያኦዛሂ ኮራፓ ኬዳ"ንዳ ዓኮ ዬሩሳላሜኬ፤ ታኣኮዋ ዓኮ ሱንያ ዒዛ ዑፃ ታ ፃኣፓንዳኔ።

13 «ሺኢጲያ ማኣሮም ዓያና" ጋዓ ባኮ ዋይዛ ዋይዚ ዓኣህሂ ዋይዘንጎ!» ጌዔኔ።

ሎዶቂያ ሺኢጲያ ማኣሮም ኬኤዚንቲ ባኣዚ"

14 ሐህሂ ዒ ኬኤዛዎ፡- «ሎዶቂያ ሺኢጲያ ማኣሮ ኪኢታንቸህሂም ሂዚ ጌዒ ፃኣፔ፤

3:5 ኬሲ. ማፃ 32፡32-33፤ ዓይኑ. 69፡28፤ ዮሐ. ያፔሳ 20፡12፤ ማጉ. 10፡32፤ ሉቃ. 12፡8። 3:7 ዒሲ. 22፡22፤ ዒዮ. 12፡14። 3:8 ዒሲ. 49፡23፤ 60፡14፤ 43፡4። 3:12 ዮሐ. ያፔሳ 21፡2፤ ዒሲ. 62፡2፤ 65፡15።

«ሐይ፡ ጎኔ ማዔያ፡ ጉሙርቂንታያ፡ ጎኔ ማርካ ማዔያ፤ ሃሣ ያኦሲ ማገርንታ ቢያ ዒዛ ዛሎ"ና ማዔሢ ከኤዜያኬ፤ ¹⁵ ኤኤኮ ማዶ" ታ ዔራኔ፤ ሺሜታቱ ሺሜ፡ ያይዲታቱና ኔ ያይዲቱዋሴ፤ ኤኤኒ ሺሜ ሃንጎ ያይዲታቱ ኮሺታዎ ዓቲ"ኔ፤ ¹⁶ ያዲ ኔ ማዑዋዎ ጉሪ ቦልዕ ቦልዕ ጋዓያታሢሮ ዳንጋፓ ታ ኔና ጩታኒኬ፤ ¹⁷ ታኣኒ ያርጎቲኬ፤ ሚርጌ ቆሎ ታኣኮ ዓኣኔ፤ ታኣሞ ፓጩ፡ ዓይጎ ባኣዚ"ያ ባኣሴ» ኔ ጋዓኔ፤ ጋዓንቱ ኔ ሜታዳያ፡ ማንቃቶና ዓሲኮ ዋልቃ ጌላያ፡ ዔኤቢባኣ ማንቆ፡ ዓኣፒ ባይቂያ፤ ሃሣ ካሎ"ታሢያ ኔ ኔና ዔራዋሴ፤ ¹⁸ ኤኤኒ ያርጎጫኒ፡ ታሞይዳ ዓገንቲ ጎኑማ ዔርቲ ዋርቆንታ ኤኤኮ ቦርሳ ካሎ"ሞ ዓኣቻኒ ቦኦሬ ዓፒላንታ ታ ገዳ"ፓ ኔ ሻንቃንዳጉዲ፡ ዛጋኒያ ዓኣፖ ቲሽኮ ዴኤሾ ኔ ሻንቂ ቲሽካንዳጉዲ ታ ኔና ዘራኔ። ¹⁹ ታኣኒ ናሽካዘንሢ ቢያ፡ ሜቶ ዒንገ ጎራ"ኔ፤ ዬያሮ ዶዴ፤ ጎሞዋ ኤኤኮ ቡኡ፩። ²⁰ ሐይሾ፡ ታኣኒ ካራ" ዔቂ <ማኣሪ ዓሲዮ> ጌይ ዔኤሊ"ንታኔ፤ ያኣኒያ ታኣኮ ዑኡዘ ዋይዚ ካሮ" ታኣሞ ቡሌ"ቲ ዒዛ ባንሢ ታ ጌሊ ዒዛና ዋላ" ሙኡዚ" ሙዓንዳኔ፤ ዒዚያ ታኣና ዋላ" ሙዓንዳኔ፤ ²¹ ታኣኒ ያሎ ባሺ ታ ዓዶና ዋላ" ታ ዓዶኮ ካኣቱሞ ያይታ" ዴዔሢጉዲ፡ ያሎ ባሺሢያ ታኣና ዋላ" ታ ካኣቱሞ ያይቶይዳ ታ ዴይሣንዳኔ።

²² «ሺኢጲያ ማኣሮሞ ዓያና" ጋዓ ባኮ ዋይዛ ዋይዚ ዓኣሢ ዋይዘንጎ!» ጌዔኔ።

4

ጫሪንጮይዳ ያኦሲኮ ካኣቱሞ ያይቶና ዒኢካ ሺኢቂንታ ሺኢጲያ

¹ ዩካፓ ጫሪንጮይዳ ቡሊ"ንቲ ዓኣ ካራ ታ ዴንቄኔ፤ ዬማና ዛዬ ዑኡሲጉዲ ከኤዛ ቤርታኣ ዑኡዛሢ፡ «ሐኒ፡ ሃንጋ ከሰኬ፤ ሐይፓ ሴካ፡ ቤርታ ማዓንዳ ባኣዚ" ታ ኔና ዳዋንዳኔ» ታኣሞ ጋዓዛ፤ ² ቤዘማና ታኣኒ ዓያና ጌኤሺ ማለሢዳ ጌሌኔ፤ ዓካሪ ዒማ"ና ጫሪንጮይዳ ካኣታ" ዴዓ ያይታ ጌሢንቲ ዓኣንቲታ ዴንቄኔ፤ ³ ዬኖ ያይቶይዳ ዴዒ ዓኣሢኮ ዓውካራ ሚርጌ ሚዛጳ ዒያሰጲዴና ሴርዲኖኔ ጌይንታ ሹጮ ዑያ ማለያኬ፤ ካኣቱሞ ያይቶኮ ኮይላ" ሜሪጌዴ ጌይንታ ሹጮ ዑያ ማለ ሚዛጲ ዠኡሎ ዓኣኔ። ⁴ ዬያጉዲ ሃሣ ካኣቱሞ ያይቶ ኮይላ" ሜሌ" ላማታሚ" ያይዶ ካኣቱሞ ያይታ ዓኣኔ፤ ዬንሢ ያይቶንሢዳ ቦኦሬ ማኣዎ ማይንቲያ ሃሣ ቶኦኮ"ይዳኣ

ዋርቁጋ ኮሾ"ና ቦንቾም ዓሳ ባኮ ዓጌ ለማታሚ" ያይዶ ጋርቺ ዴዒ ዓኣኔ። ⁵ ካኣቱም ያይታሢዳጋ ዜኤሊንሢና ዑኡሲና ሃሣ ጉጉንሢያ ኬሰኬኔ፤ ሃሣ ዬያ ያይታሢኮ ቤርታ ፖዒ ፖዓ ለንካይ ያምፔ ዓኣኔ፤ ዬያታ ለንካዋ ያኦሲ ዓያፍንሢኬ። ⁶ ሐሣ ዬያ ያይታ"ሢ ቤርታ ለማሌኤሽጉዲ፥ ጌኤሽኪ ጴዳ ባዚ" ዓኣኔ።

ካኣቱም ያይቶ ኮይሎይዳ ያይዶ ዛላ" ሚርጌ ዓኣፒ ዓኣ ያይዶ ዲማ ዲማ ማዢንቲ ዓኣኔ። ⁷ ቤርታኣ ባካሢ ዘቢ" ማላያ፥ ለምዓሳሢ ጌማይ ማላያ፥ ሃይሣሳሢ ጌንሣ ዓሲ ዓኣፒ ካራ ማላ ዓውካሬ ዓኣያኬ፤ ያይዳሳ፥ ጋፒንፃሢ ባራና ኮኣኬ ማላያኬ። ⁸ ዬንሢ ያይዶ ባኮንሢኮ ላሆ" ላሆ" ጋኣሲ ዓኣኔ፤ ዬያቶኮ ዙሎ"ና ጋርናይዳ ዲቢ ዓኣፒ ዓኣያኬ፤ ዔያታ ዋንቶና ርኣርና፡- «ያኦሲም ዲማዴሢዮ! ዲማዴሢዮ! ዲማዴሢዮ!

ቢያ ባኣዚ" ዳንዳዓ፥ ጎዳ ማዔ ያኣዛሢዮ!

ሐሢ ዓኣሢና ሚናፓኣ ናንጋሢዮ

ሐጊያ ሙካንዳሢዮ!»

ጋዓኔ፤ ዬያ ዔያታ ሃሹ"ዋፖ ጋዓኔ።

⁹ ዬንሢ ባኮንሢ ካኣቱም ያይቶይዳ ዴዒሢም፥ ናንጊና ናንጋሢም፤ ቦንቾ፥ ሄርሺሢ፥ ጋላታኣ ሺኢሻ ዋዶ"ና ቢያ፥ ¹⁰ ለማታሞ ያይዶ ጋርቾንሢ ናንጎና ናንጋሢም፥ ካኣቱም ያይቶይዳ ዴዒሢም ጉምዓቲ ዚጋኔ፤ ዔያቶኮ ቶኦካ" ዓሳ፥ ቦንቾ ባኮ ካኣቱም ያይቶ ቤርታ ጌሢ፡-

¹¹ «ኑ ጎዳ ማዔ ኑ ያኣዛሢዮ!

ቢያ ባኣዚ" ኔ ማዢሢሮ

ቢያ ባካ ማዢንቲሢና ማዔሢ፥

ኔ ማሊያና ማዔሢሮ

ቦንቾና ሄርሺሢና ዋልቄያ ኔኤም ኮይሳያኬ»

ዔያታ ጋዓኔ።

5

ማርንቲ ማፃኣፖና ማራዓሢና ዛላ

¹ ካኣቱም ያይቶይዳ ዴዒሢኮ ሚዛቆ ኩጫ፥ ጋርና ዙሎ"ናይዳ ቢያ ፃኣፒንቲያ ሃሣ ለንካይ ዔርዘ ማላታ ዑፃ ያኣኒያ ቡሎ"ዋጉዲ ዓይሦና ማርንቲ ማፃኣፔ ታ ዛጌኔ፤ ² ፔቲ፥ ኪኢታንቾሰኬይ

4:5 ኬሲ. ማፃ 19፥16፤ የሐ. ያፔዳ 8፥5፤ 11፥19፤ 16፥18፤ ሂዚ. 1፥13፤ የሐ. ያፔዳ 1፥4፤ ዛካ. 4፥2። 4:7 ሂዚ. 1፥22፤ 1፥5-10፤ 10፥14። 4:8 ሂዚ. 1፥18፤ 10፥12፤ ዒሲ. 6፥2-3። 5:1 ሂዚ. 2፥9-10፤ ዒሲ. 29፥11።

ዴ'ጊ ጌዔ ዑኡሲና፡- «ዩንሢ ዔርዛ ማላቶንሢ ቡላ"ኒና ማፃኣፖዋ ቡላ"ኒ ዳንዳዓሢ ያናዳይ?» ጋዓንቲ ታ ዛጌኔ። ³ ጋዓንቲ ጫሪንጮይዳ ሳይይዳ ሃሣ ሳዎኮዋ ዴማ" ማፃኣፖ ቡላ" ጋርይዳ ዓኣ ባኮ ዛጋኒ ዳንዳዓ ዓሲ ያኦኒያ ባኣያ ማዔኔ፤ ⁴ ማፃኣፖሢ ቡላ" ጋር ዛጋኒ ዳንዳዓ ዓሲ ጴዲባኣያ ማዔሢ ታ ዴንቄ ዋድ"ና ሚርጌና ዩኤኬኔ፤ ⁵ ዩማና ጋርቾንሢዳፓ ፔቲ"ይ፡- «ዩኤኪፖ፤ ሓኣዛጌ፡ ዪሁዳ ማኣራፓ ማዔ፡ ዘባ"ሢ፡ ዳውቲ ፃጳሢ ያሎና ባሼያ ማዔሢር ዒዚ ማፃኣፓሢና ላንካዋ <ቡሎ"ፓ> ጌይንቲ ማላቶንሢ ቡላ"ኒ ዳንዳዓያኬ» ታኣም ጌዔኔ።

⁶ ዩካፓ ካኣቱሞ ያይቶና ያይዶ ባኮንሢናኮ ሓሣ ጨሞንሢኮዋ ባኣካ" ዋድናያ ማላ ማራይ ዔቂ ዓኣንቲ ታ ዛጌኔ፤ ዩያ ማራዓሢኮ ላንካይ ጉራኒና ላንካይ ዓኣፒና ዓኣኔ፤ ዩያታ ዓጮ" ቢያ ዳኪንቲ ላንካዋ ያኦሲ ዓያኖንሢኬ። ⁷ ማራዓሢ ሙኪ ካኣቱሞ ያይቶይዳ ዴዔሢኮ ሚዛቆ ኩጫ ዓኣ፡ ማፃኣፓሢ ዔኬኔ፤ ⁸ ዒዚ ማፃኣፖ ዔካማና ያይዶ ባኮንሢንታ ላማታሞ ያይዶ ጨሞንሢንታ ማራዓሢኮ ቤርታ ጉሞዓቲ፡ ባሊቶና ሂርኪ ጌዒ ዘጌኔ፤ ዩያታ ፔቲ" ፔቲ"ሢ ኩጮይዳ ጎኦላ" ዔኪ ሃሣ ያኦሲም ዴማዴ ዓሶኮ ሺኢጲያ ማዔ ዑንጅ ዓርቄያ ዋርቄና ኮሾ"ና ዔቲ ማዔ ዳካ" ሳኣኔ ዔኪ ዓኣኔ። ⁹ ዔያታ ቤርታ ጌይንቲ ቤቂባኣ ያኦሲ ቦንቾም ማዓ ዓይኑሞ፡-

«ማፃኣፓሢ ዔካኒና

<ቡሎ"ፖ> ጌይንቲ ማላቶንሢ ቡላ"ኒ

ኔ ዳንዳዓያ ማዔኔ፤

ዋይቲ ጌዔቲ ኔኤኒ ዋዲንቲኔ፤

ኔኤኮ ሱጉያና ዴማ ዴማ ቶኦካ"ፓ

ዴማ ሙኡቺ ጌሰታ ዓሶፓ፡ ዜርፃፓ

ሓሣ ዓሲ ቢያ ባኣካ"ፓ ዴማሲ

ዓሶ ያኦሲም ኔ ጊንሣ ማሢ ሻንቄኔ፤

¹⁰ ኑ ያኦዛሢማኣ ቄኤሴ ማዒ

ዔያታ ማዳንዳጉዲ ኔ ማሄኔ፤

ሳይይዳኣ ዔያታ ካኣታዳንዳኔ»

ጌዒ ጌዒ ዓይናዴኔ።

¹¹ ዩካፓ ሃሣ ታ ዛጋያ ካኣቱሞ ያይቶና ያይዶ ባኮንሢና ጨሞንሢናኮ ኮይላ" ሚርጌ ኪኢታንቾኮ ዑኡሲ ታ ዋይዜኔ፤

5:5 ማዢ. ማፃ 49፡9፤ ዒሲ. 11፡1፤ 10። 5:6 ዒሲ. 53፡7፤ ዛካ. 4፡10።

5:8 ዓይኑ. 141፡2። 5:9 ዓይኑ. 33፡3፤ 98፡1፤ ዒሲ. 42፡10። 5:10 ኬሲ.

ማፃ 19፡6፤ የሓ. ያፔዳ 1፡6።

ዬያቶኮ ሚርጉማ ሚርጌ ሺያፓ ዑሣ ሃሣ ፓይዲንታኒያ
ዳንዳዒንቱዋያኬ፤ 12 ዬያታ ዴኤፒ ዑኡሲና፡-

«ዋዲንቱ ማራዒሢም ዋልቄ፥ ቆሎ

ዔራቶ፥ ደዲሞ፥ ቦንቾንታ ሄርሺሢንታ

ጋላታንታ ኮይሳያኬ» ጌይ ዓይናዴኔ።

13 ዬካፓ ጫሪንጮና ሳዖናይዳ፥ ሳዖኮዋ ዴማ" ሐሣ ዴኤፖ
ባዘ"ናይዳ፥ ዬያ ባኮ ቢያይዳ ዓኣ ማዢንታ ቢያ፡-

«ካኣቱሞ ያይቶይዳ ዴዔሢና ማራዒሢም

ጋላታ፥ ቦንቾ፥ ሄርሺሢንታ ዋልቄንታ

ናንጊና ማዖንጎ» ጌይ ዓይናዴንቱ ታ ዋይዘኔ።

14 ያይዶ ባኮንሢያ «ዓኣሜን» ጌዔኔ፤ ጋርቾንሢ ጊንሣ ባሊቶ ሳዖ
ባንሢ ሄርኪዲ ጉምዓቲ ዘጌኔ።

6

«ቡሎ"ፖ» ጌይ ዓይሦና ዔርዛ ማላቶንሢኮ ቡሊ"ንቲያ

1 ዬካፓ ማራዒሢ ለንካዎ «ቡሎ"ፖ» ጌይ ዓይሦና ዔርዛ
ማላቶንሢዳፓ ቤርታሳዘ ቡሊ"ንቲ ታ ዘጌኔ፤ ዒማ"ና ያይዶ
ባኮንሢዳፓ ፔቲ"ሢ ጉጉንሢጉዴ ዑኡሲና «ሐኒ ዬዔ!» ጋዓንቲ
ታ ዋይዘኔ። 2 ዒማ"ና ቦኦሬ ፓር ታ ዴንቄኔ፤ ዬያ ፓራሢ ዓኣዛ ዓርቄ
ዓሲ ቶጊ ዓኣኔ፤ ዒዛም ቦንቾር ቶኦካ" ዓጎ ባካ ዒንጊንቲኔ፤ ዒዚያ
ዖሎና ባሻያ ማዒ ባሺ ባሺ ዓኣዳኒ ኬሰኬኔ።

3 ማራዒሢ ለምዓሳ ዔርዛ ማላቶ ቡሊ" ዋዶ"ና ለምዓሳ ባካሢ
«ሐኒ ዬዔ!» ጋዓንቲ ታ ዋይዘኔ። 4 ሐሣ ሜሊ" ሱጉሢጉዲ ዘቄ
ፓራ ኬሰኬኔ፤ ዬያ ቶጌሢም ሳያይዳ ኮሺ ናንጊ ባይዛንዳጉዲና
ዓሲ ዋሊ ዋዳንዳጉዲ ማሃንዳ ቢታንቶ ዒንጊንቲኔ፤ ዴኤፒ ጩንቻ
ዓፓርዋ ዒዛም ዒንጊንቲኔ።

5 ማራዒሢ ሃይሣሳ ዔርዛ ማላቶ ቡሊ" ዋዶ"ና ሃይሣሳ ባካሢ
«ሐኒ ዬዔ!» ጋዓንቲ ታ ዋይዘኔ፤ ዒማ"ና ታ ሃሣ ካርሢ ፓር
ዴንቄኔ፤ ዬያ ፓራሢ ቶጌሢ ኩጫ ዴኤሠሞ ዔርዛ ባኣዚ" ዔኪ
ዓኣኔ። 6 ዬካፓ ያይዶ ባኮንሢ ባኣካ"ፓ ዑኡሲጉዴ ባኣዚ" ታኣም
ዋይዚንቲያ ማሌኔ፤ ዬና ዑኡዛ «ዛላ ኪሎ ማዓ ዛርጌ ፔቲ" ኬሊ"
ማዶና ማዶ" ዛላ ዒንጊንታያ፥ ፔቲ" ኪሎና ዛላና ማዓ ዔልዓ ዬና
ጎይያ ፔቲ" ኬሊ" ማዶ ማዴም ዒንጊንታያ ማዖም፤ ዛይቶና ዋይናፓ
ኮሾ"ና ዑጉና ጋዓንቲ ፑርቲሲ፥ ባይዚፖ» ጋዓንቲ ታ ዋይዘኔ።

7 ማራወሃ ያይዳሳ ዔርዛ ማላቶ ቡሌ" ወደ"ና ያይዳሳ ባካሂ «ሐኒ ይዔ!» ጋዓንቴ ታ ወይዘኔ፤ 8 ይማና ጋላፒ ፓር ታ ዳንቄ፤ ይያቶ ገሳ፤ ዓሂኮ ሱ"ንፃ ሐይቢ ጌይንታያኬ፤ ዒዛኮ ጊንያ ዓርቂ ሐይቄ ዓሳ ኬዳ" ቤዛ ሙኪ ሙኪ ዓኣኔ፤ ዔያቶም ሳዎኮ ዛሎ"ኮ ዛሎ" ያልዚና፤ ናይዚና፤ ፑርታ ዶርዖና ሃሃ ካይዚ ቦዖና ወዲሺ ባይዛንዳጉዲ ቢታንቶ ዒንጊንቴ።

9 ዶንጋሳ ዔርዛ ማላቶ ዒ ቡሌ" ወደ"ና የኦሲ ቃኦሎ"ና ዔያታ ማርካዴ ማርካቶ ዛሎ"ናሮ ጌይ ወደና ዓሶኮ ሽምፓሂ የኦሲም ዒንጊ ካኣሽኮ ቤዛኮ ደማ" ዓኣንቴ ታ ዳንቄ፤ 10 ዔያታ ዴጊ ጌዔ ዑኡሲና፡- «ዲማዴያ ሃሃ ጎኔ ማዔያ፤ ቢያሂኮ ዑፃ ማዔ ጎዳሂዮ! ሳያይዳ ዓኣ ዓሶይዳ ኔ ዋጉዋኣሂና ኑ ሱጉየ ዛሎ"ዋ ኮዋ ኔ ዔኩዋኣሂ ወማ ሄላ"ንዳኣናዳይ!» ጌዒ ጌዒ ዒላታ። 11 ይካፓ ፔቴ" ፔቴ"ዘንሂም ቦኦሬ ማኣዓ ዒንጊንቴ፤ ሃጊ ዔያቶጉዲ ወደንዶ፤ የኦሲም ማዴያ ማዔ፤ ዔያቶኮ ላጎ ሃሃ ዒሽንሂ ማዔዘንሂኮ ፓይዳ" ኩማንዳያ ሄላ"ንዳኣና ዳካ" ዔያታ ጊቢ" ዳንዳዒ ደዓንዳጉዲ ዔያቶም ኬኤዚንቴ።

12 ይካፓ ማራወሃ ላሃ"ሳ ዔርዛ ማላቶ ቡላ"ንቴ ታ ዛጌ፤ ይማና ሳዓ ሚርጌና ዓጊፄ፤ ዓባ" ካርሂ ዓፒላጉዲ ካርታዛ ዓጊና ጉቤና ሱጉሂጉዲ ዘቄ፤ 13 ዴኤፒ ዠባሬ ቤሌሴ ሚያ ዓጊሃ ወደ"ና ካፂባኣ ዓኣፓ ሚፃፓ ዲኢናሂጉዲ ጨሪንጮ ዠኦጋሂያ ዲኢኔ። 14 ጨሪንጮ፡ ማሪንቴ ማፃኣፖጉዲ ማዒ፤ ማርቲ ዳንዴ፤ ሃሃ ዴኮ"ንታ ዋኦያ ሳዛ" ዓኣ ዓጫ" ዓኣ ቤዛፓ ሺኢኪ ባይቄ።

15 ዓጮ"ኮ ዲማ ዲማ ካኣታ"፤ ወይሃ ዓሳ፤ ፖኦሊሶ ዓይሃ ዓሳ፤ ዖርጎጮ ዓሳ፤ ዶዶ ዓሳ፤ ደማ" ማዒ ማዳ ዓሶንታ ማዲሻ ዓሶንታ ቢያ ዴና ባኣካ" ዓኣ ዔቶና ዴኮ"ና ሃሃ ላሎ ቆኦፖናይዳ ዓኣሺንቴ፤ 16 ይካፓ ዴኮ"ና ላሎናም፡- «ኑ ዑያይዳ ዶዑዋቴ! ካኣቴዋ ያይቶይዳ ዴዔሂና ማራወሃናኮ ጎሪ"ንታፓ ኑና ዓኣቹዋቴ!

17 ዓይጎሮ ጌዔቴ ዴኤፖ ዔያቶኮ ጎሪ"ንቶ ኬላ" ሙኬሂሮ የኦኒ ይያኮ ቤርታ ዔቃኒ ዳንዳዓንዳይ?» ጌዔ።

7

144000 ዒሰራዔኤሌ ዓሶ

6:8 ሂዚ. 14፡21። 6:12 የሐ. የፔዳ 11፡13፤ 16፡18፤ ዒሲ. 13፡10፤ ዒዪ.

2፡10፤ 3፡15፤ ማቴ. 24፡29፤ ማር. 13፡24-25፤ ሉቃ. 21፡25። 6:13 ዒሲ. 34፡4።

6:14 የሐ. የፔዳ 16፡20። 6:15 ዒሲ. 2፡19-21። 6:16 ሆሴ. 10፡8፤

ሉቃ. 23፡30። 6:17 ዒዪ. 2፡11፤ ሚል. 3፡2።

1 ዩካፓ ያይዶ ከኢታንቻ ዓጮ"ኮ ያይዶ ዛሎ"ና ዓቂቂ ዓኣንቲ ታ ዴንቄኔ፤ ዔያታ ሳያይዳ መገም ባዘ"ይዳ ሃሣ ሚያይዳ ዓይጎ ዠባሬያ ዠባርሹዋጉዲ ዓጮ"ኮ ያይዶ ዛሎ"ፓ ሙካ ዠባር ቢያ ላኣጊ ዓርቄኔ። 2 ሐሣ ጊንሣ ናንጊና ናንጋ ያኣዛሂኮ ዔርዛ ማላቶ ኩጫ ዔኬ፤ ማሌ" ያኦሲ ከኢታንቻ ዓባ" ኬሰካ ዛሎ"ፓ ሙካንቲ ታ ዴንቄኔ፤ ዒዚያ ሳያና ባዘ"ና ባይዛንዳጉዲ ቢታንታ ዒንጊንቲ ያይዶ ከኢታንቻንሣሚም ዴኤፒ ዑኡሲና። 3 «ኑ ያኣዛሂም መጻ ዓሶኮ ባሊቶይዳ ዱማሲ ዔርዛ ማላቶ ኑ ዓይሣንዳያ ሄላ"ንዳኣና ሳያ ማዔቲያ ባዘ"፤ ሃሣ ሚያዋ ዔኤቢ ዋኦቲፖቲ» ጌዔኔ። 4 ዔርዛ ማላቶ ዓይሣንቲ ዓሶኮ ፓይዶ" ታ ዋይዘኔ፤ ዩያታ ዒሰራዔኤሌ ፃጰ ቢያይዳፓ ማዔያ ፃኤታና ያይዲታሚ" ያይዶ ሺያ ዓሲኬ። 5-8 ዪሁዳ ፃጰፓ፤ ሮኦቤኤሌ ፃጰፓ፤ ጋኣዴ ፃጰፓ፤ ዓሴኤሬ ፃጰፓ፤ ኒፕታኣሌኤሜ ፃጰፓ፤ ሚናኣሴ ፃጰፓ፤ ሲሞኦኔ ፃጰፓ፤ ሌዊ ፃጰፓ፤ ዪሳኮኦሬ ፃጰፓ፤ ዛብሎኦኔ ፃጰፓ፤ ዮሴፔና ቢኢኒያሜና ፃጰፓ፤ ዩያ ፔቲ" ፔቲ"ሣ ፃጰፓ ታጶ ላምገ ሺያ፤ ሺያ ዓሲም ማላታ ዓይሣንቲኔ።

ቦኦሬ ማኣያ ማይንቲ ሚርጌ ዴሬ

9 ዩካፓ ያኦኒያ ፓይዳኒ ዳንዳዑዋ፤ ሚርጌ ዓሲ ታ ዴንቄኔ፤ ዩያታ ዱማ ዱማ ዴሬይዳፓ፤ ቶኦኪዳፓ፤ ዜርሣዳፓ፤ ሙኡቹ ጌሰታ ዓሲዳፓ ቡኬ ዓሲኬ፤ ዔያታ ቦኦሬ ማኣያ ማይንቲ፤ ሜኤፃ ዒላሺያ ፔ ኩጫ ዓርቂ ካኣቱሞ ያይቶና ማራዓሢና ቤርታ ዔቃዖ፤ 10 ዴኤፒ ዑኡሲና፡-

«ዳቂንታ ኑም ጴዴሢ ካኣቱሞ ያይቶይዳ ዴዔ፤

ኑ ያኣዛሢና ማራዓሢናይዳፓኬ» ጌዒ ጌዒ ዒላታኔ።

11 ከኢታንቻ ቢያ ሃሣ ካኣቱሞ ያይቶና ጋርቻንሢና ሃሣ ያይዶ ባኮንሣኮ ዓጫ ዔቂ፤ ካኣቱሞ ያይቶ ቤርታ ባሊቶና ሂርኪ ጌዒ ያኦሲም ዚጋዖ፤ 12 ሂዚ ጌዔኔ፡-

«ዓኣሜን፤ ሄርሺሢና ቦንቻና ዔራቶና፤

ጋላታና ዴኤፒሲሢና ዋልቄና ዶዱሞና፤

ኑ ያኣዛሢም ናንጊና ማገንጎ፤ ዓኣሜን።»

13 ዩማና ጋርቻንሢዳፓ ፔቲ" ታ ባንሢ ሺራዖ፡- «ሐንሢ ቦኦሬ ማኣሣሢ ማይንቲዘንሢ ያናንሢዳይ? ዓንካፓ ዔያታ ሙኬይ?» ጌዒ ታና ያኦጩኔ።

14 ታኣኒያ ማሃዖ፡- «ጎዳሢዮ! ኔ ዔራኔ» ጋዓዛ፤ ዒዚ «ሐንሢ ዴኤፖ ሜታሢ ጊዴና ኬሰኪ ሙኬዘንሢኬ፤ ዔያታ ፔኤኮ

ማእዓሢያ ማራዓሢ ሱጉያና ማሰኪ ቦኦሪሼኔ፤ 15 ዬያሮ ያኦሲ ካኦቱሞ ያይቶ ቤርታ ዋንቴና ሮኦሪና ጌኤዠ ማኦሮይዳ ዒዛም ማዳኔ፤ ካኦቱሞ ያይቶይዳ ዴዔሢ ዔያቶ ባኦካ" ማዒ ዔያቶኮ ሺባ"ሢ ማዓንዳኔ። 16 ሐካፓ ሴካ ዔያታ ናይዲንታዓኬ፤ ዴኤቢያ ዴኤቢንታዓኬ፤ ዓቢ ዔያቶ ሚቻዓኬ፤ ሩኡጲያ ዔያቶ ሄላ"ዓኬ፤ 17 ዓይጎሮ ጌዔቴ ካኦቱሞ ያይቶ ባኦካ" ዓኦ ማራዓሢ ዔያቶኮ ሄንቃሢ ማዓንዳኔ፤ ናንጎ ዓልቃ ዋኦያ ባንሢያ ዔያቶ ዒ ዔኪ ዓኦዳንዳኔ፤ ያኦሲ ዔያቶኮ ዓቢያ ዓኦፓፓ ቢያ ዑጫንዳኔ» ታኦም ጌዔኔ።

8

ቡሊ'ንቶፓ ጌይ ዓይሦና ለንካሳዘኮ ቡሊ'ንቲያ

1 ማራዓሢ ቡሊ'ንቶፓ ጌይ ዓይሦና ለንካሳ፡ ባኬሎ ቡሊ' ዎዶ"ና ጫሪንጫ ዎይዚንታ ባኦዚ" ባኦያ ማዒ፡ ዳካ" ዘቲኾ ጌዔኔ፤ 2 ዬካፓ ያኦሲ ቤርታ ዔቃ፡ ለንካዎ ኪኢታንቸ ታ ዴንቄኔ፤ ዔያቶም ዒማ"ና ለንካይ ዛዬ ዒንጊንቴኔ።

3 ዑንጅ ጩቢሶያ ዎርቄና ኮሺ"ንቴ ሱሢ ኩንዔ ኩጫ ዔኬ፡ ኪኢታንቸ ሙካያ ያኦሲም ዒንጎ ባካ ዒንጊንታ ቤዘ ኮይላ" ዔቃዛ ካኦቱሞ ያይቶ ቤርታ ዓኦ፡ ዎርቄና ኮሺ"ንቴ ያኦሲም ዒንጎ ባኮ ዒንጎ ቤዛ፡ ያኦሲም ዴማዴ ዓሶኮ ሺኢጲያና ዎላ" ያኦሲ ቤርቶ ሺኢጳንዳጉዲ ሚርጌ ዑንጅ ዒዛም ዒንጊንቴኔ። 4 ዑንጅኮ ጩባ" ያኦሲም ዴማዴ ዓሶኮ ሺኢጲያና ዎላ" ኪኢታንቸሢ ኩጫፓ ያኦሲ ቤርቶ ኬሰኬኔ። 5 ዬካፓ ኪኢታንቸሢ ጩቢሶ፡ ሱያ ኩንዎ ዔኪ ያኦሲም ዒንጎ ባኮ ዒንጎ ቤዛፓ ታሚ ካኦሺ ሱያ ኩንዎይዳ ኩንሢሰካፓ ሳዎ ባንሢ ኬኤራዛ ጉጉንሢና ዴኤፒ ዑኡሲና ሓሣ ዜኤሊንሢያ ዜኤሊንሢያም ሳዓ ዓጊጃኔ።

ኪኢታንቸ ዛያሢ ዎርቄሢ

6 ዬካፓ ለንካይ ዛዬ ኩጫ ዔኬ፡ ለንካይ ኪኢታንቸሰኬንሢ ዛያሢ ዎርቃኒ ጊኢጊንቴኔ።

7:14 ዳኦኔ. 12፡1፤ ማጉ. 24፡21፤ ማር. 13፡19። 7:16 ዒሲ. 49፡10። 7:17 ዓይኑ. 23፡1፤ ሂዚ. 34፡23፤ ዓይኑ. 23፡2፤ ዒሲ. 49፡10፤ 25፡8። 8:3 ዓዋ. 9፡1፤ ኬሲ. ማፃ 30፡1፤ 3። 8:5 ለዊ. ዓኬ 16፡12፤ ሂዚ. 10፡2፤ ኬሲ. ማፃ 19፡16፤ የሐ. ያፒዳ 11፡19፤ 16፡18።

7 ቤርታሳ ኪኢታንቻሢ ዛያሢ ዋርቃዛ፥ ሱጉሢ ሲኢሪንቴ ሻቺና ታሚና ሳዓ ኬዴ"ኔ፤ ዬማና ዛላኮ ዛላ ጊንሢ ማዓ ሳዓ ሚጩኔ፤ ሚያንታ ዓኣዔ ማኣቶንታኮ ዛላኮ ዛላ ማዓይ ቢያ ሚጩኔ።

8 ሃሣ ላምዓሳ ኪኢታንቻሢ ዛያሢ ዋርቃዛ ታሚ ዔኤታ፥ ዴኤፒ ዲካ ማላ ባኣዚ" ባዘ"ይዳ ኬዳ"ዛ ዛላኮ ዛላ ጊንሢ ማዓይ ቢያ ባዘ"ኮ ሱጉሢ ማዓይ፤ 9 ባዘ"ይዳ ናንጋ፥ ሺምፓ ዓኣ ባኮኮ ዛላኮ ዛላ ማዓይ ቢያ ሓይቄ፤ ሃሣ ዋኣፆ ካኣሚሎኮ ዛላኮ ዛላ ጊንሢ ማዓይ ቢያ ፑርቲ ጋፔ።

10 ሃይሣሳ ኪኢታንቻሢ ዛያሢ ዋርቃዛ ፆምፔጉዲ ዔኤታ ዴኤፒ ዠኦጌ ጫሪንጫፓ ዋሮ ዋኣፆና ዓልቃ ዋኣፆናኮ ዛላኮ ዛላ ማዓ ጊንፆይዳ ኬዴ"ኔ፤ 11 ዬያ ዠኦጋሢኮ ሱንፃ «ዋላንጋ» ጌይንታያኬ፤ ዬያሮ ዋኣፆኮ ዛላኮ ዛላ ጊንሢ ማዓይ ቢያ ጫንቺ ማዓይ፤ ዋኣፆኮ ጫንቄፆይዳፓ ዔቄና ሚርጌ ዓሲ ሓይቄ።

12 ፆይዳሳ ኪኢታንቻሢ ዛያሢ ዋርቃዛ ዓቦ"ንታ ዓጊኖንታ ዠኦጋሢንታኮ ዛላኮ ዛላ ጊንሢ ማዓይ ቢያ ዲይንቴ፤ ሮኦርንታ ዓጊኖንታኮ ዛላኮ ዛላ ማዓ ጊንፆይዳ ፖዒ ፖዑዋጉዲ ላኣጊንቴ።

13 ዬካፓ ሃሣ ፔቴ" ኮኦኬ ጫሪንጫ ባራናንቴ ታ ዴንቄ፤ ዬይ ዴኤፒ ዑኡሲና፡ «ዓቴ" ሓይሣ ኪኢታንቻሢ ዛያሢ ዋርቃዛ ዋይዚንታንዳ ዑኡዘ ዛሎ"ና ሳፆይዳ ናንጋ ዓሶም ባዴዔ! ባዴዔ! ባዴዔ!» ጋዓንቴ ታ ዋይዜ።

9

1 ዶንጋሳ ኪኢታንቻሢ ዛያሢ ዋርቃዛ፥ ዒማ"ና ጫሪንጫፓ ሳዓ ኬዴ" ፔቴ" ዠኦጌ ታ ዴንቄ፤ ዬያ ዠኦጋሢም ዴኤፖ፥ ዒጊቻ ዔቶ * ቡሎ" ቁልፔ ዒንጊንቴ። 2 ዒዚ ዔቶ ቡሎ" ዋዶ"ና ዓንሢ ታሚፓ ኬሰካ፥ ጩቢጉዴ ጩቢ ዒታፓ ኬሰኬ፤ ዬይ ዒታፓ ኬሰካ ጩባ" ዓቦ"ንታ ጫሪንጫንታ ቢያ ዲሚሺኔ፤ 3 ዬያ ጩቦ" ባኣካ"ፓ ዓቢሢ ሳፆይዳ ኬዴ"ኔ፤ ዬያቶም ሳፆይዳ ዓኣ ኮርናሢም ዒንጊንቴ ዋልቆጉዴ ዋልቄ ዒንጊንቴ፤ 4 ሳፆይዳ ዓኣ ማኣቶ"ንታ ዋርቄ ዓኣ ዒላሺንታ ሃሣ ዲማ ዲማ ሚፆ ዔያታ ካኣሙዋጉዲ ዔያቶም ኬኤዚንቴ፤ ጋዓንቴ ዔያታ ሜታሳንዳጉዲ ጌይንቴሢ ባሊቶይዳ የኦሲር ማዒፆ ዔርዘ ማላታባኣ ዓሶኬ። 5 ዬያቶ ዶንጋ

8:7 ኬሲ. ማፃ 9፥23-25፤ ሂዚ. 38፥22። 8:10 ዒሲ. 14፥12። 8:11 ዔር. 9፥15። 8:12 ዒሲ. 13፥10፤ ሂዚ. 32፥7፤ ዒፄ. 2፥10፤ 3፥15። * 9:1 ዴኤፖ፥ ዒጊቻ ዔቶ፡- ጌይፃ ሳፆኮ ዴማ" ፃላሆ ዓያና" ጋፒንፆ ዋጎ ኬሎ" ሂላ"ንዳኣና ዴዒ ዓኣ ቤዘኬ። 9:2 ማዢ. ማፃ 19፥28። 9:3 ኬሲ. ማፃ 10፥12-15። 9:4 ሂዚ. 9፥4።

ዓገሊ ሌሊ ሜታሳንዳጉዲ ማዓንዳጎታቱም ዋዳንዳጉዲ ዋልቄ ዒንገሊባኦቤ፤ ዔያታ ሜታሳንዳ ጎይፃ ኮርና ዓሲ ዳዓዖ ሜታሳሢ ጎይፃ ሜታሳንዳጉዲኬ። 6 ዬንሢ ኬሎ"ንሢዳ ዬና ዓሳ ሓይቃኒ ኮዓንዳኔ፤ ጋዓንቴ ዔያቶም ማዓዓኬ፤ ሓይቢ ዔያታ ሱኡካዳንዳኔ፤ ጋዓንቴ ሓይቢ ዔያቶ ኮይላ"ፓ ዴንዲ ባይቃንዳኔ።

7 ዓቢፃ የልዚም ገኢጌ ፓሮ ማላኔ፤ ዔያቶኮ ቶኦኮ"ይዳ ዓጎያ፡ ዋርቄና ኮሺ"ንቴ ቦንቾሮ ዓጎ ባካ ዓኣኔ፤ ዓኣፖ ካራ" ዔያቶኮ ዓሲሮ ማላያኬ፤ 8 ዔያቶኮ ቶኦኮ" ጋፓና ላኣሊሮ ማላኔ፤ ዓጫ ዔያቶኮ ዘቢ" ዓቺ ማላያኬ፤ 9 ዓንገና ኮሺ"ንታ የሎ ማኣዓሢ ማላ፡ ማኣዓ ዔያቶኮ ዓኣኔ፤ ዔያቶ ጋኣዞኮ ዑኡዛ የልዚሮ ዓኣዳ ሚርጌ ፓሮና ሳርጌላ የይታናኮ ካኣኒ ማላያኬ። 10 ኮርኖጉዲ ዑንኪና ዳዓ፡ ቤልሢ ዔያቶኮ ዓኣኔ፤ ዓሶ ዔያታ ዶንጎ ዓገሊ ሜታሳንዳ ዋልቃ ዔያቶኮ ዑንኮይዳ ዓኣኔ። 11 ዔያቶ ዋይሣ ካኣቲ ዔያቶኮ ዓኣኔ፤ ዒዚ ዴኤፖ፡ ዒጊቻ ዔያቶኮ ኪኢታንቻሢኬ፤ ሱንፃ ዒዛኮ ዔብሬ ዓሶ ሙኡጮና «ዓብዶኔ»፤ ገሪኬ ዓሶ ሙኡጮና «ዓጲሎኔ» ጌይንታኔ፤ ዬና ጌይፃ «ባይዛ» ጌይሢኬ።

12 ቤርታሳ ሜቶ" ዋዳ" ጋፔኔ፤ ዓካሪ ሃሣ ሜሌ" ለምዖ ሜቶ ዋዴ ሙካንዳኔ።

13 ላሃ"ሳ ኪኢታንቻሢ ዛያሢ ዋርቃዛ፡ የኦሲ ቤርታ ዓኣ ዋርቆና ኮሺ"ንቴ የኦሲም ዒንጎ ቤዞኮ የይዶ ዛላ" ዓኣ፡ ጉራኖ ማላ ባካፓ ዑኡሲ ኬሰካንቴ ታ ዋይዜኔ፤ 14 ዬና ዑኡዛ ዛያሢ ዔኪ ዓኣ፡ ላሃ"ሳ ኪኢታንቻሢም፡- «ዴኤፖ ዔፕራዒሴ ዋርይዳ ቱኡቱ፡ የይዶ ኪኢታንቻንሢ ቡሌ"!» ጌዔኔ። 15 ዬኖ ኬሎ"ና፡ ዬኖ ዋዶ"ና፡ ዬኖ ዓገናና፡ ዬኖ ሌዖናም ገኢገንቴ የይዶ ኪኢታንቻንሢ ዓሶይዳፓ ዛላኮ ዛላ ማዓ ዓሲ ዋዳንዳጉዲ ቱኡዛፓ ቡሊ"ንቴኔ። 16 ፓራሢና የላ ዓሶኮ ሚርጉማ ዲቢ ሺያና ፓይዲንታያ ኮሺ" ዲቢታሢ ፓይዶ" ታ ዔያቶኮ ዋይዜኔ። 17 ፓራሢና ፓራሢ ቶጊ ዓኣ ዓሶና የኦሲ ታና ዳዌም ታኣኒ ዛጋንቴ ያዲኬ፡- ዳዳ ዔያቶኮ የሎሮ ዔያታ ማኣዔ ባካ ታሚጉዲ ዙቄ ሃሣ ጮልዔ ገንሣ ጨኢጮ ቡኒጉዲ ጋላፒኬ፤ ፓርንሢኮ ቶኦካ" ዘቢ" ቶኦኪ ማላያ፡ ዔያቶኮ ዳንጋፓ ታሚና ጨቢና ዓንሢ ዒኢሊ"ጉዴ ዒኢሊ"ያ ኬሰካኔ፤ 18 ዔያቶኮ ዳንጋፓ ኬሰኪ «ባይዞም» ጎያና ባኮና ጌይፃ፡- ታሞና ጨቢና ሃሣ ዒኢሎ"ና ዓሶኮ ዛላኮ ዛላ ገንሢ ማዓያ ቢያ ዋዴኔ። 19 ፓርንሢኮ ዋልቃ ዔያቶኮ ዳንጎና ዑንኮናይዳኬ፤ ዑንካ ዔያቶኮ ሸኦሺ ማላኔ፤ ሃሣ

ሾኦሺ ቶኦኪጉዳ ቶኦኪ ዔያቶኮ ዓኣኔ፤ ዓሶ ዔያታ ሜታሲ ዎዳሢ ይያናኬ።

20 ይንሢ «ባይዞም» ጌይንቴ ባኮንሢ ዎዲዎንቴ ዓቴ" ዓሳ ፔኤኮ ማዴ ፑርቶ ማዶ" ቡኡዲ ሃሺ"ባኣሴ፤ ይይያ፡- ፃላሄንታ ዎርቄይዳፓ፡ ቢራ ዓንጊዳፓ፡ ሞኦኖ ዓንጋፓ፡ ሹቺፓ ሃሣ ሚሢፓ ኮሺ"ንቴያ፡ ዛጋኒያ ዎይዛኒያ፤ ሃሣ ዓጊዲ ሃንታኒያ ዳንዳዑዎ ካኣሽኮ ባኮንታ ዔያታ ካኣሽኪያ ሐሺ"ባኣሴ ጌይሢኬ።

21 ይያጉዲ ሃሣ ሽምፖ ዎዲሢ፡ ማርሻ ማርሻሢ፡ ማቾ ሃሣ ዓኒ ማዒባኣያና ላሂሢ፡ ዉሱሞ፤ ይያ ባኮ ዔያታ ቡኡዲ ሐሺ"ባኣሴ ጌይሢኬ።

10

ኪኢታንቻሢና ዳኮ" ማሪንቴ ማፃኣፔሎና

1 ይካፓ ሃሣ ሻኣሬ ማይንቴያ፡ ሜሌ" ዴኤፒ ኪኢታንቻ ጫሪንጫፓ ኬዳ"ንቴታ ዴንቄኔ፤ ዒዛኮ ቶኦኮ" ዓጮ ሸሬ፡ ዠፑኡሎ ዓኣኔ፤ ይያኮ ዓኣፖ ካራ" ዓቢጉዴያ፡ ቶካ ዒዛኮ ሃሣ ቱርቴሪጉዲ ዔቄታሚ ማላያኬ፤ 2 ዒዚ ኩጮይዳ ዳካ" ቡሊ"ንቴ ዓኣ፡ ማሪንቴ ማፃኣፔ ዔኪ ዓኣኔ፤ ዒማ"ና ዒ ሚዛቆ ቶኮና ባዞ"ይዳ፡ ሻዉሎ ቶኮና ሳዖይዳ ሄርቄ ዔቄ ዓኣኔ፤ 3 ሐሣ ዒ ዘቢ" ዑኡሲ ማላ፡ ዴኤፒ ዑኡሲና ዒላቴኔ፤ ዒዚ ዒላታዛ ላንካዎ ጉጉንፆንሢ ፔ ዑኡዞና ዑኡዞና ጌሰቴኔ። 4 ይያታ ፔ ዑኡዞና ጌሰቴ ዎዶ"ና ታኣኒ ፃኣፓኒ ማሌኔ፤ ጋዓንቴ፡- «ላንካዎ ጉጉንፆንሢ ጌሰቴ ባኮ ዓኣቺ ዓርቄ፤ ፃኣፒፖ» ጋዓ ዑኡሲ ጫሪንጫፓ ታ ዎይዜኔ።

5 ይካፓ ባዞ"ና ሳዖይዳ ሄርቄ ዔቄ ዓኣንቴ ታ ዛጌ ኪኢታንቻሢ ፔኤኮ ሚዛቆ ኩጮ ሌካ ጫሪንጫ ባንሢ ዔቄሳዖ፡ 6 ዒዚ ናንጊና ናንጋሢ፡ ጫሪንጫና ሳዖና ባዞ"ና ይያቶይዳ ዓኣ ባኮ ቢያ ማዠፍ ያኦዛሢ ሱንፆና ጫኣቄኔ፤ ዒ ጫኣቄሢ፡- «ዓካሪ ማይ ኔጋዓኬ! 7 ጋዓንቴ ላንካሳ ኪኢታንቻሢ ዛያሢ ዎርቃ ኬሎ"ንሢና ያኦሲም ማዳ፡ ዒዛ ማሊያ ኬኤዛዞንሢም ፔጋሲ ዔርዜ ሳይያና ዒዛኮ ዓኣሺንቴ ማሊያ ኩማንዳኔ» ጌይኬ።

8 ይካፓ ጫሪንጫፓ ታ ዎይዜ ዑኡዛ፡- «ባዞ"ና ሳዖይዳ ሄርቄ ዔቄ ዓኣ ኪኢታንቻሢ ፔ ኩጫ ዔኬ፡ ቡሊ"ንቴ ዓኣ፡ ማሪንቴ ማፃኣፔሎ ዴንዲ ዔኬ» ጌይ ላሚ ሃሣ ታኣም ኬኤዜኔ።

9 ይማና ታኣኒ ከኢታንቻሢ ባንሢ ዓኣዲ፡- «ዳኮ፡፡ ማሪንቴ ማፃኣፔሎ ታኣም ዒንጌ» ጋዓዛ፡ ዒዚያ፡- «ዔኪጋፓ፡ ዒዞ ሙዔ፤ ጎጾም ዒዛ ኔኤኮ ጫንቃንዳኔ፤ ዳንጋ ኔኤኮ ጋዓንቴ ዔኤሲጉዲ ዓኣፃንዳኔ» ታኣም ጌዔኔ፡፡

10 ታኣኒ ዳኮ፡፡ ማሪንቴ ማፃኣፔሎ ከኢታንቻሢ ኩጫፓ ዔኪ ሙዒዛ ዳንጋ ታኣም ዔኤሲጉዲ ዓኣፃኔ፤ ጊንፃፓ ታኣኮ ጎጾ ዒዛ ጫንቄኔ፡፡ 11 ዩካፓ ሃሣ፡- «ሚርጌ ዓሶ ዜርፆ ዛሎ፡፡ ዲማ ዲማ ዴር፡፡ ዲማ ሙኡጮ ጌሰታ ዓሶና ካኣቶ፡፡ ዛሎ፡፡ ላሚ ሃሣ ያኦሲ ማለሢ ኬኤዛንዳያ ኔና ኮይሳኔ» ታኣም ጌይንቴኔ፡፡

11

ለምፆ ማርካ

1 ዩካፓ ያዶሱሞና ዳልጉሞና ሃሣ ዔጶና ዋርቆያ ዎኦሺ ማላ ሚሢ ታኣም ዒንጊንታዮ፡- «ዓኣዲ፡ ያኦሲኮ ጌኤዢ ማኣርና ያኦሲም ዒንጊያ ዒንጎ ቤዘና ዋርቄ፤ ሃሣ ዒኣካ ካኣሽካ ዓሶዋ ፓይዳ፤

2 ጌኤዢ ማኣርኮ ዙላ" ዓኣ ጳኦኮ" ጋዓንቴ ዋርቄ፡፡ ሃሺ"፤ ዩይ፡- ሜሌ" ዴር"ም ዒንጊንቴ ቤሲኬ፤ ዔያታ ያኦሲም ዲማዴ ካታሚሎ ያይዲታሚ" ላምፆ ዓጊኒ ጉቤ ባሺ ወይሣንዳኔ፤ 3 ላምፆ ታኣኮ ማርኮንሢ ሲዬ ፓቲሌ ማይንቴ ፔቴ" ሺያና ላምፆ ፂኤታና ላሂ"ታሚ" ኬሊ" ታ ማለሢ ኬኤዛንዳጉዲ ዋልቄ ታ ዔያቶም ዒንጋንዳኔ» ጌይንቴኔ፡፡

4 ዩንሢ ማርኮንሢ ሳያይዳ ጎዳ ቤርታ ዔቃ፡ ላምፆ ሪሚቶ ሚያንሢና ላምፆ ፖያ ጌሦ ሻርፍንሢናኬ፤ 5 ያኦኒያ ዔያቶ ማኣሳንሢ ማሌቶ ታሚ ዔያቶ ዳንጋፓ ኬሰኪ ዩያቶ ሚቻንዳኔ፤ ዔያቶ ማኣሳንሢ ኮዓሢ ቢያ ሓይቃንዳ ጎይፃ ዩያይዲኬ፡፡ 6 ዔያታ ታ ማለፆ ኬኤዛ ወዶ"ንሢዳ ዒርዚ ዋርቄዋጉዲ ጫሪንጮ ዴርቃኒ ዔያቶኮ ቢታንቶ ዓኣኔ፤ ዩያጉዲ ዋኣፆ ሱጉሢ ማሂ ላኣማኒ ኮዔ ወዶ"ና ቢያ ዓይጎ ባኣዚ"ናኣ ማፆም ሳያ ባይዛንዳ ባኣዚ"ና ጳርቃኒ ቢታንቶ ዔያቶኮ ዓኣኔ፡፡

7 ዔያታ ፔኤኮ ማርካቶ ጋፒሴሢኮ ጊንፃ ዴኤፖ፡ ዒጊቻ ዔታፓ ኬሰካንዳ ቦዓሢ ዔያቶና ያልቲ ባሻንዳኔ፤ ወዲያ ዔያቶ ወዲንዳኔ፡፡

8 ሌዛ ዔያቶኮ ኮኣኪንሢና ሶዶኦሜ፡ ሃሣ ጊብፄ ጌይንታ ዴኤፖ ካታሚሎኮ ዓሳ ቡካ ጳኦካ" ኬኤሪንታንዳኔ፤ ዩና ካታሚላ ዔያቶኮ

10:10 ዒዚ. 2፡8-33፡፡ 11:1 ሂዚ. 40፡3፤ ዛካ. 2፡1-2፡፡ 11:2 ሉቃ. 21፡24፡፡ 11:4 ዛካ. 4፡3፤ 4፡11-14፡፡ 11:6 1ካኣቶ". ማ 17፡1፤ ኬሲ. ማፃ 7፡17-19፤ 1ሳሙ. 4፡8፡፡ 11:7 ዳኣኔ. 7፡7፤ ዮሐ. ያፔዳ 13፡5-7፤ 17፡8፡፡

ጎዳሢ ሱዳንቴ ካታሚሎኬ። 9 ደማ ደማ ዜርፃፓ፡ ቶኦካ"ፓ ሐሣ ደማ ደማ ሙኡቺ ጌስታ ዓሰና ደሮ"ናይዳፓ ማዕ ዓሳ ሐይሆ ኬሊ"ና ዘላና ማዕንዳኣና ሌዘ ዓይቶኮ ዒኢካ ዓኣንቴ ዘጋንዳኔ፤ ሌዘ ዓይቶኮ ደኡኪንቴዋጉዲ ላኣገንታያ ማዕንዳኔ፤ 10 ዩንሢ፡ ለምዖ፡ ጾሱ ማሊያ ኬኤዘዘንሢ ሳይደሳ ናንጋ ዓሰ ሜታሰሢረ ሳይደሳ ናንጋ ዓሳ ዓይታ ሐይቄሢረ ዋዛዳንዳኔ፤ ዩያ ዋዛ"ፓ ዓይታና ዓይቶኮ ሐይቦ" ኬሎ" ቦንቾ ኬሊ" ማሢ፡ ዋለም ዒንጎ ባኣዚ"ያ ዒንጋንዳኔ፤ 11 ሐይሆ ኬሊ"ና ዘላና ማዕሢኮ ገንፃ ጋዓንቴ ሸምፖ ዒንጋ፡ ጾሱኮ ቡኡዘ ጾሱደፓ ሙኪ ሌዘ ዓይቶኮ ጌሌም፡ ዓይታ ዓይቄሢረ ዓይቶ ዘጌ ዓሳ ሚርጌና ዒጊጨኤ። 12 ዩካፓ ለምዖ ጾሱ ማሊያ ኬኤዘዘንሢ፡- «ሐንጋ ኬሰኩዋቴ!» ጋዓ ዴኤፒ ቡኡሲ ጨሪንጫፓ ዋይዜኔ፤ ዩማና ዓይቶኮ ሞርካ ዓይቶ ዘጋ ጎይሣ ዓኣንቴ ሻኣሬና ሌካ ጨሪንጫ ዓይታ ዓኣዴኔ። 13 ዒማ"ና ሳዓ ሚርጌ ዓጊፃኔ፤ ካታሚሎኮዋ ታጽይዳፓ ፔቴ"ማ ማዓ፡ ቤዛ ቢያ ደዒ ጋፔኔ፤ ዩያይዲ ዓጊፃያና ላንካይ ሺያ ዓሲ ሐይቄኔ፤ ሐይባ"ፓ ዓቴዘንሢ ሚርጌና ዒጊጨ፡ ጨሪንጫ ጾኣዘሢ ጋላቴ፡ ቦንቹኔ።

14 ለምዓሳ ሜታሢ ዋዳ" ጋፔኔ፤ ሐይሾ ዓካሪ ሃይሣሳ ሜታሢ ዋዳ" ቡኬና ዩዓንዳኔ።

ኪኢታንቻሢ ዋርቄ ላንካሳ ዘያሢ

15 ላንካሳ ኪኢታንቻሢ ዘያሢ ዋርቃዛ፡ ጨሪንጫይዳ፡- «ዓጮ" ካኣቱማ

ኑ ጎዳሢ ማዕ ጾኣዘሢና ዒዛኮ ሚሲሔናም ማዕኔ፤ ዒዚያ ናንገና ካኣታዳንዳኔ» ጋዓ ዴኤፒ፡ ዴኤፒ ቡኡሲ ዋይዜንቴኔ።

16 ጾሱ ቤርታ፡ ካኣቱም ያይቶይዳ ዴዒ ዓኣ፡ ለማታሞ ያይዶ ጋርቾንሢ ባሊቶና ሳይ ባንሢ ሂርኪ ጌዒ ጉምዓቲ ጾሱም ዚጌኔ፤

17 ዓይታ ዚጋ ዋዳ"ና፡-

«ሐሢ ዓኣያ ሚናፓ ናንጋያ
ቢያ ባኣዚ" ዳንደዓ ጎዳ ማዕ ጾኣዘሢና!
ዴኤፖ ዋልቆ፡ ኔኤር ኔ ማሢሢረ
ሐሢ ኔ ካኣታዴሢረዋ ኔና ኑ ጋላታኔ።

18 ሜሌ" ዴራ" ሚርጌና ዳጋዴኔ፤

ሃሢ ኔ ዳጋ"ኣ ሙኬኔ፤
ሐይቄ ዓሰይዳ ኔ ዋጋ ዋዳ"ኣ ሄሌ"ኔ።

11:8 ዒሲ. 1፡9-10። 11:11 ሂዚ. 37፡10። 11:12 2ካኣቶ". ማ 2፡11።

11:13 ዮሐ. ጾፔዳ 6፡12፤ 16፡18። 11:15 ኬሲ. ማፃ 15፡18፤ ዳኣኔ. 2፡44፤

7፡14።

ኔኤም ማዳ፥ ኔ ማሊያ ኬኤዛዞንሢና
 ኔኤም ዲማዴዞንሢና ሱንያዋ ኔኤኮ ቦንቻዞንሢም
 ዳኮ"ና ዴኤፖ ማዴዞንሢናም
 ዔያታ ማዴሢ ዛሎ" ማሂ ኔ ዒንጋንዳ ዋዳ"
 ሓሣ ዓጮ" ባይዘዞንሢያ ኔ ባይዛንዳ ዋዳ" ሄሌ"ኔ» ጌዔኔ።

19 ዬካፓ ጫሪንጫ ዓኣ፥ የኦሲኮ ጌኤዢ ማኣራ ቡሊ"ንታዛ
 ጋርይዳ ዒዛኮ ጫኣቁም ሳኣደና ዓኣያ ማዒ ጴዴኔ፤ ዬማና
 ዘኤሊንሢ ዘኤሊንሢኔ፥ ዴኤፒ ዑኡሲ ዋይዚንቴኔ፥ ጉጉንሢያ
 ጉጉንሢኔ፥ ሳዓኣ ዓገፄኔ፥ ዴኤፒ ሻቺያ ኬዴ"ኔ።

12

ለኣሌሎና ዴኤፖ ሾኦዣሢና

1 ዬካፓ ዴኤፒ ሃሣ ዲቃሢ ሄርሺሳ ማላታ ጫሪንጫይዳ ጴዴኔ፤
 ዒኢካ ዓቢ ማኣያጉዲ ማይንቲ፥ ዓገሮ ቶኪና ሄርቂ ዔቁ፥ ሃሣ ታጶ
 ላምዎ ዡኣጌ ቦንቻሮ ዓሳ ባኮጉዲ ፔኤኮ ቶኦካ" ዓገንቲ ዓኣ ፔቴ"
 ላኣሊሰኬና ጴዴኔ። 2 ዒዛ ጎጲና ዓኣያታዎ ሾይቺ ዓርቁም ሜታዲ
 ዒላቴኔ፤

3 ዬያጉዲ ሃሣ ሜሌ" ማላታ ማዒ ባኣዚ" ጫሪንጫ ጴዴኔ፤
 ዬይያ፡- ለንካይ ቶኦኪና ታጶ ጉራኒና ዓኣ፥ ዴኤፒ ዘቁ ፑኡፒ ሾኦሺ
 ጴዴኔ፤ ዒዚ ቶኦካ" ቶኦካ" ለንካይ ቦንቻሮ ዓሳ ባኮ ዓገሊ ዓኣኔ፤

4 ዒዚ ፔኤኮ ዑንኮና ዛላኮ ዛላ ገንሢ ማዓ ዡኦጎ ቢያ ጫሪንጫፓ
 ጎቺ ዔኪ ሳዓ ኬኤሬኔ፤ ዬካፓ ላኣሌላ ሾዓዛ፥ ናዎ ሙዒ ላኣሌሎኮ
 ቤርታ ዔቁኔ፤ 5 ላኣሌላ ዓጮ" ዴሮ" ቢያ ባሺ፥ ዋይሣንዳ ዓቲንቁ
 ናይ ሾዔኔ፤ ናዓሢ ጋዓንቲ ሌካ የኦሲኮ ካኣቱም ያይቶ ባንሢ
 ዔውቴኔ፤ 6 ዒማ"ና ላኣሌላ ዓሲ ናንጉዋ ዳውሎ" ዓኣሺንቲ
 ዓኣዴኔ፤ ዒኢካ ፔቴ" ሺያና ላምዎ ፄኤታና ላሂ"ታሚ" ኬሊ" ኮይሳ
 ባኣዚ" ቢያ ዒንገሊ ካፒንታንዳ ቤሲ የኦሲ ዒዞም ገኢጊሺኔ።

7 ዬካፓ ጫሪንጫይዳ የልዚ ዔቁኔ፤ ዒኢካ ሚካዔኤሌ ጌይንታ
 ኪኢታንቻሢና ዒዞም ዓይሢንቲ ማዳ ኪኢታንቻ ዴኤፖ ሾኦዣሢና
 ዒዛኮ ኪኢታንቻና ዋላ" የልቲሢ ዓርቁኔ፤ 8 ጋዓንቲ ዴኤፖ
 ሾኦዣሢና ዒዛኮ ኪኢታንቻና ባሺንቴኔ፤ ዬማፓ ጫሪንጫ ዔያቶኮ
 ቤሲ ባይቁኔ። 9 ዴኤፖ ሾኦዣሢ ሊካ ሳዓ ኬኤሪንቴኔ፤ ዬይ፡-

11:18 ዓይኡ. 2፥5፤ 110፥5፤ 115፥13። 11:19 ዮሐ. ያፔጳ 8፥5፤ 16፥18፤ 21።

12:3 ዳኣኔ. 7፥7። 12:4 ዳኣኔ. 8፥10። 12:5 ዒሲ. 66፥7፤ ዓይኡ. 2፥9።

12:7 ዳኣኔ. 10፥13፤ 12፥1፤ ጸሁ. 9።

ዓሶ ቢያ ዳቢሻሢ፡ ዲያቢሎስ ሃሣ ገንሣ ፃላሄ ጌይንታ ሚናኣ ሾኦዣሢኬ፤ ዒዛና ዋላ" ዒዛኮ ኪኢታንቻኣ ኬኤሪንቴኔ።

10 ዬካፓ ፔቴ" ዴኤፒ ዑኡሲ ጫሪንጮይዳ፡-

«ዓካሪ፡ ዳቂሺሢና ዋልቄና

ሃሣ ካኦቱሞዋ ኦ ያኦዛሢም ማዕኔ፤

ቢታንቶዋ ማሲሔም ማዕኔ!

ዋይቲ ጌዔቴ ኦ ዒሾንሢና ኦ ሚሾንሢና

ኦ ያኦዛሢ ቤርታ ዋንቴና ርኦሪና

«ዒያታ ዳቤያኬ» ጌዒ ፑሽካሢ ኬኤሪንቴኔ።

11 ዒያታ ማራዓሢኮ ሱጉያና

ሃሣ ዒያታ ማርካዴ ማርካቶና

ያሊ ዒያታ ዒዛ ባሼኔ፤

ፔ ሼሞፓሢ ሃሣ ዒያታ ሚጨንቱዋ

ፔና ሃይቢም ዓኣሢ ዒንጌኔ፤

12 ዬያሮ ጫሪንጮና ዒኢካ ናንጋዞንሢዮ ዋዛዲዋቴ!

ሳያንታ ባዘ"ንታ ዒንሢም ጋዓንቴ ባዴዔቴ!

ዓይጎር ጌዔቴ ዲያቢሎስ ዒ ማዳንዳ ዋዳ" ዳካ" ሌሊ ዓቴ"ሢ ዒሪ

ዴኤፒ ዳጋና ዒንሢ ባንሢ ኬዴ"ኔ» ጋዓንቴ ታ ዋይዘኔ።

13 ዴኤፒ ሾኦዣሢ ሳያይዳ ኬኤሪንቴሢ ዛጋያ ዓቲንቆ ናዓሢ

ሾዔ ላኦሌሎ ዳውሴኔ፤ 14 ዬማና ላኦሌላ ዓሲ ናንጉዋ ዳውሎይዳ

ዒዘም ገኢሺሾና ቤዘ ባራኒ ዓኣዳንዳጉዲ ዴኤፒ፡ ኮኦኬ ጋኦሲ

ማላ ላምያ ጋኦሲ ዒዘም ዒንገንቴኔ፤ ዬይያ፡- ዒኢካ ሾኦዣሢዳፓ

ሃኪ ሐይሆ ለዔና ዛላና ኮይሳ ባኦዚ" ዒዘም ዒንገንቴም ሜታ

ባኦያ ናንጋንዳጉዲኬ። 15 ላኦሌሎ ዲዲ ሙዓንዳጉዲ ሾኦዣሢ

ዋርዚ ዋኦሢጉዴ፡ ዲቢ ዋኦሢ ዳንጋፓ ኬሲ" ላኦሌሎ ገንዖ

ጮኦሽኬኔ። 16 ሳዓ ጋዓንቴ ላኦሌሎ ማኣዳ"ኒ ሾኦኪንቲ፡ ዴኤፒ

ሾኦዣሢ ፔ ዳንጋፓ ኬሲ" ላኦሌ ዋኦያ ዑሽኬኔ። 17 ዒማ"ና

ሾኦዣሢ ላኦሌሎይዳ ዳጋዲ ያኦሲ ዓይሢያ ካፓዞንሢና ዬሱሴም

ጉሙርቂንታያ ማዒ ማርካዳ፡ ዒዘ ዜርያፓ ዓቴዞንሢና ያልታኒ

ዓኣዴኔ። 18 ዴኤፒ ሾኦዣሢ ባዘ" ዓጫ ዓኣ፡ ማኣሻላ" ዒቄኔ።

13

ባዘ"ና ሳያናፓ ኬሰኬ ላምያ ቦዖንሢ

12:9 ማዢ. ማፃ 3፡1፤ ሉቃ. 10፡18።

12:10 ዒዮ. 1፡9-11፤ ዛካ. 3፡1።

12:14 ዳኦኔ. 7፡25፤ 12፡7።

1 ዩካፓ ፔቴ" በየ ባዛ"ፓ ኬሰካንቴ ታ ዛጌኔ፤ ዬያኮ ታጾ ጉራኒና ለንካይ ቶኦኪና ዓኣያ ማዓዛ፣ ዒዛኮ ጉራኖይዳ ታጾ በንቸሮ ዓሳ ባካ ዓጊንቴ ዓኣኔ፤ ሃሃ ዒዛኮ ቶኦኮ"ንሢዳ ጫሺ ሱንሢ ፃኣፒንቴ ዓኣኔ። 2 ዬይ ታ ዛጌ በዓሢ ማኣኪ ማላያኬ፤ ቶካ ዒዛኮ ጋዓንቴ ጉዲሪ ማላ «ዲቤ» ጌይንታ በየ ቶኪ ማላያ፣ ዳንጋ ሃሃ ዒዛኮ ዘቢ" ዳንጋ ማላያኬ። ዴኤፖ ሾኦኸሢ ፔኤኮ ዋልቆና ፔኤኮ ካኣቱም ያይቶ ሃሃ ዴኤፖ ቢታንቶዋ ዬያ በዓሢም ዒንጌኔ። 3 ዒዛ ቶኦኮኮ ፔቴ"ማይዳ ዋዳንዳያ ማላ ኪሢ ዓኣያ ታ ዛጌኔ። ጋዓንቴ ዬይ ኪፃ ፓፂም፣ ዓጮ" ዓሳ ቢያ ዲቃቲ ሄርሺ ሄርሺ ዒዛ ጊንፃ ዓኣዴኔ። 4 በዓሢም ዒዚ ቢታንቶ ዒንጌሢሮ ዓሳ ቢያ ዴኤፖ ሾኦኸሢም ዘጌኔ፤ ዔያታ ዚጋሢ፡- «በዓሢጉዲ ማዓንዳይ ያናዳይ? ዒዛና ዋላ" ያልታንዳሢ ያናዳይ?» ጌዒ ጌዒኬ።

5 ያቶርቂ ጌሰታንዳያና ጫሺ ጫሽካንዳ ዳንጋ በዓሢም ዒንጊንቴኔ፤ ሃሃ ያይዲታሚ" ለምዖ ዓጊኒያ ዒዚ ቢታንቶና ማዳንዳጉዲ ዒዛም ዓይሢንቴኔ። 6 ዒዚ ያኦሲንታ ያኦሲ ሱንፆንታ ያኦሲ ናንጋ ቤዘንታ ሃሃ ጫሪንጫ ናንጋዘንሢ ጫሽኪሢ ዓርቄኔ።

7 ያኦሲም ዲማዴ ዓሶ ዒ ያለንዳጉዲና ያሊያ ባሻንዳ ቢታንቶ ዒዛም ዒንጊንቴኔ። ዲማ ዲማ ዜርፆ፣ ቶኦኮ"፣ ዲማ ሙኡቺ ጌሰታ ዓሶ፣ ዲማ ዲማ ዴሮ" ዑፃ ቢታንቶ ዒዛም ዒንጊንቴኔ።

8 ሳዓ ማገርንቴማፓ ዓርቃዖ ዋድና ማራዓሢኮ ናንጎ ማፃኣፓ ሱንፃ ፃኣፒንቴባኣያ፣ ሳይዳ ናንጋ ዓሳ ቢያ በዓሢም ዚጊ ካኣሽካንዳኔ።

9 «ዋይዛ ዋይዚ ዓኣይ ዓኣቶ ዋይዘንጎ!

10 ያኦኒያ ዲዒንታኒ ዓኣይ ዓኣቲ ዲዒንታንዳኔ፤

ጩንቻ ዓፓርና ሓይቃንዳይ ዓኣቶዋ

ጩንቻና ሓይቃንዳኔ»

ዓካሪ፣ ያኦሲም ዲማዴ ዓሶኮ ጊቢ" ዳንዳዒያና ጉሙርቂያና ዔርታንዳሢ ዬኖ ዋዶ"ናኬ።

11 ዩካፓ ሃሃ ሜሌ" በየ ሳዓፓ ኬሰካንቴ ታ ዛጌኔ፤ ዬያኮ ማሪይ ጉራኒ ማላ፣ ለምዖ ጉራኒ ዓኣኔ፤ ዒ ጌሰታ ጎይፃ ዴኤፖ ሾኦኸሢ ጎይፆኬ። 12 ቤርታኣ በዓሢ ሱንፆና ጉቤ ቢታንቶ ዓኣያ ማዒ ዒ ማዳኔ፤ ሳያና ዒኢካ ናንጋ ዓሳ ቢያ ዋዳኒ ዑኬ ኪፃ ፓፂ፣ ቤርታኣ በዓሢም ዚጊ ካኣሽካንዳጉዲ ዓሶ ማሄኔ። 13 ዬይ ለምዓሳ በዓሢ ዓሶ ቤርታ ጫሪንጫፓ ታሚ ኬይሳንዳያ ሄላ"ንዳኣና

13:1 ዳኣኔ. 7:3፤ ዮሐ. ያፔዳ 17:3፤ 17:7-12። 13:2 ዳኣኔ. 7:4-6። 13:6 ዳኣኔ. 7:8፤ 11:36። 13:7 ዳኣኔ. 7:21። 13:8 ዓይኑ. 69:28። 13:10 ዔር. 15:2፤ 43:11።

ዲዛኮ ዓኣ ቢታንቶና ዴኤፒ ዴኤፒ ማላታ ዳዋኔ። 14 ቤርታኣ ሰዓሢ ሱንጾና ዲ ማዳንዳጉዲ ቢታንቶ ዲዛም ዲንገንቴያታሢሮ ዲ ዳዋ ማላቶ ዛሎ"ና ሳዓ ናንጋ ዓሶ ቢያ ዳቢሻኔ፤ ሃሣ ጨንቾ ዓፓሮና ከፃሶናንቴ ዳቄ፥ ሰዓሢኮ ማላታ ማዛንዳጉዲ ዓሶ ዓይሄኔ። 15 ዬያ ሰዓሢም ቤርታኣ ሰዓሢኮ ማላቶም ሾሞፖ ዲንጋ ዑኡሲ ዲንጋንዳጉዲ ቢታንቶ ዲንገንቴኔ፤ ዬይ ቢታንታ ዲንገንቴሢ ማላታ ጌሰታንዳጉዲና ዬያ ማላቶም ዘጊ ካኣሽኩዋ ዓሳ ሓይቃንዳጉዲ ማሆም ጌይኬ። 16 ዬያጉዲ ሃሣ ዳኮ" ማዕቴያ ዴኤፓ፥ ያርጎጮ ዓሶ ማዕቴያ ማንቆ ዓሳ፥ ማዲሻሢ ማዕቴያ ማዲ ዓሳ ቢያ ፔኤኮ ሚዛቆ ኩጮይዳታቴያ ባሊቶይዳ ማላቶ ጌሃንዳጉዲ ዓሶይዳ ዋልቃዴ፤ 17 ዬይ ያዲ ማዕሢ ሰዓሢ ሱንጾ ማዕ፥ ማላታ ሃሣ ገንሣ ፓይዳ"ባኣ ዓይጎ ዓሲያ ዔኤቢ ሻንቻኒና ሻንቃኒያ ዳንዳዑዋጉዲኬ።

18 ዬይ ዔራቶ ኮይሳያኬ፤ ዲኔና ጨንጫ ማዕሢ ሰዓሢኮ ፓይደ" ፓይዲ ዔሮንጎ፤ ዓይጎሮ ጌዔቴ ፓይደ" ዓሲ ፓይዲ ማዕሢሮኬ፤ ዬና ፓይደ" ላሆ" ያኤታና ላሂ"ታሚ" ላሆ"ኬ።

14

ማራዓሢንታ ያኤታና ያይዲታሚ" ያይደ ሺዮ ዓሶ

1 ዬካፓ ሐሣ ማራዓሢ ያዮኔ ዳኮ"ይዳ ዔቂ ዓኣንቴ ታ ዛጌኔ፤ ዲዛና ዋላ" ዲዛ ሱንጾና ዲዛኮ ዓደ ሱጾና ባሊታ ፃኣፒንቴ ዓኣ፥ ያኤታና ያይዲታሚ" ያይደ ሺያ ዓሲ ዓኣኔ። 2 ዬሮና ጫሪንጮይዳፓ ዴኤፒ ሶኦሪንታ ዋኣሢ ዑኡሲ ሃሣ ዴኤፒ ጉጉንሢ ማላ ዑኡሲ ታ ዋይዘኔ፤ ዬይ ታ ዋይዘ ዑኡዛ ጎኦሎ" ዓይናዲ ዋርቃ ዓሳ ጎኦሎ" ዋርቃዛ ዋይዘንታ ዑኡዘጉዴያኬ። 3 ካኣቱሞ ያይቶና ያይደ ባኮንሢና ሃሣ ጋርቾንሢ ቤርታ ዬና ዲቦ" ዓሳ ቤርታ ጌይንቴ ቤቂባኣያ፥ ያኦሲ ሶንቾም ማዓ ዓይኑም ዓይናዴ፤ ዬያ ዓይኑም ዓጮ" ቢያይዳፓ ሻንቂ፥ ዲማሲ ዔኮና ያኤታና ያይዲታሚ" ያይደ ሺዮ ዓሶፓ ዓታዛ ሜሌ" ያኦኒያ ዔሪ ጋዓኒ ዳንዳዒባኣሴ። 4 ዬያታ ኩሙሢ ማዕሢሮ ላኣሊና ዲኢቲባኣያኬ፤ ዔያታ ማራዓሢ ዓኣዳ ቤዘ ቢያ ዲዛ ገንጾ ዓኣዳያኬ፤ ሃሣ ዔያታ ያኦሲና ማራዓሢኮ ቶይደ ማዓኒ ዓሶ ባኣካ"ፓ ሻንቂ፥ ዲማሲ ዔኮና ዓሶኬ። 5 ዔያታ ሉኡዙሞ ሉኡቂ ዔራዋያኬ፤ ሃሣ ዔያቶ ሰሂሳ ባኣዚ"ያ ባኣያኬ።

ሃይሃ ያኦሲ ከኢታንቾንሢ

6 ይካጥ ሳይደረግ ስንጋ ደሮ"ና ዘርፆና ደማ ሙኡጮ ገሰታ ዓሰና ደማ ደማ ቶኦኩ"ናም ቢያናገረና ባይቁዋኩኩ ሐይሶ ከኤዛኒ ኮሺ ሃይሴ ዔኪ ዓኣ፥ ሜሌ" ከኢታንቸ ጫሪንጫ ባራናንቲ ታ ዛጌኔ፤ 7 ይይ ዴኤፒ ዑኡሲና፡- «ጽሕፈት ዓገገጫዎቼ፤ ሃሃ ቦንቹዎቼ፤ ዓይጎር ጌዔቲ ዓዛኩ ዎጎ ዎጎ ዎዳ" ሄሌ"ኔ፤ ጫሪንጫና ሳይና ባዞ"ና ዓልቃ ዋኣዎና ማዘፍ ያኦዛሂም ዚጉዋቲ!» ጌዔኔ።

8 ሜሌ" ለምዓሳ ከኢታንቸሂ፡- «ፑርታ፥ ዒኢሳ ማዶ ማዶሻ፥ ማሃ ዳጋፆ ደሮ" ቢያ ዑሼ፥ ዴኤፖ ብብሎኔ ካታሜላ ዶዔኔ! ዶዔኔ!» ጌዒ ጌዒ ቤርታኣ ከኢታንቸሂ ገንፆ ዓኣዴኔ።

9 ሐይሃሳ ከኢታንቸሰኬይ ሃሃ ዴኤፒ ዑኡሲና፡- «ቦዓሂና ዒዛኩ ማላቶናም ዚገ ካኣሸካሂ ሃሃ ማላቶዋ ባሊታታቲያ ኩጮ ዑፃ ዓይሄሂ ቢያ፥ 10 ዓይጎ ባኣዚ"ናኣ ሲኢሪንቲባኣ፥ ያኦሲኮ ጎሪ"ንቶ ዑኩ ዓንጎይዳ ኩንሃና ጎሪ"ንቶ ዳጋፆ ዑኩ ዑሽካንዳኔ፤ ዬያጉዲ ሃሃ ያኦሲም ደማዴ ከኢታንቸና ማራዓሂና ቤርታ ታሚና ታሚ ያኢሊ"ናይዳ ዓገንቲ ሜታዳንዳኔ፤ 11 ዔያቶ ሜታጎ ስታሞይዳፓ ከሰካ ጩባ" ናንገረና ባይቁዋፆ ጩቢ ዴዓያ ማዓንዳኔ፤ ቦዓሂና ዒዛኩ ማላቶናም ዚገ፥ ዒዛኩ ሱንፆ ማላቶዋ ዔኪ ዓኣዘንሂኮ ቢያ ሮኦሪና ዋንቲና ሐውሾ ባኣያ ማዓንዳኔ» ጌዒ ጌዒ ሐንጎዋቶ ገንፆ ሃሃ ዓኣዴኔ።

12 ያኦሲ ዓይሂያ ካፓዘንሂና ዬሱሴም ጉሙርቂንታያ ማዒ፥ ዶዳዘንሂኮ ገቢ" ዶንዳዒፃ ዔርታንዳሂ ዒኢካኬ።

13 ዒማ"ና ሃሃ ጫሪንጫይዳፓ፡- «ፋይካፓ ሰካ ጎዳ ዬሱሴር ማዒ ሐይቃዘንሂ ባሊቲና ዓኣያኬ» ጌዒ ፃኣፔ» ጋዓ ዑኡሲ ታ ዋይዜኔ። ዓያኖ ጌኤዣ፡- «ሂዮ፥ ዔያቶኮ ማዳ" ዔያቶና ዋላ" ዓኣዳንዳሂር ላቢ"ፃፓ ዔያታ ሃውሻንዳኔ» ጋዓኔ።

14 ዬካፓ ቦኦሬ ሻኦሬ ታ ዛጌኔ፤ ዒማ"ና ሻኦር ዑያይዳ ዓሲ ናዓሂ ማላ ዓሲ ዴዒ ዓኣኔ፤ ዒዚ ቶኦኩ"ይዳ ዋርቁና ኮሺ"ንቲ፥ ቦንቸር ዓጎ ባኮ ዓገ ዓኣኔ፤ ኩጮይዳኣ ሃሃ ዓጩ ባኣቹ ዓርቂ ዓኣኔ። 15 ሜሌ" ከኢታንቸ ሃሃ ጌኤዣ ማኦራፓ ከሰካፆ ሻኦር ዑፃ ዴዓሂም ዴኤፒ ዑኡሲና፡- «ሳዓ፥ ጮኦርንዶያጉዲ ካፃኔ፤ ጮኦርንዶ ዋዳ"ኣ ሄሌ"ሂር ጮኦር ባኣጮና ጮኦሬ» ጋዓዛ፤

14:8 ዒሲ. 21፥9፤ ዒር. 51፥8፤ ዮሐ. ያፒዳ 18፥2። 14:10 ዒሲ. 51፥17፤ ማዢ. ማፃ 19፥24፤ ሂዚ. 38፥22። 14:11 ዒሲ. 34፥10። 14:14 ዳኣኔ. 7፥13። 14:15 ዒዪ. 3፥13።

16 ሻኦሮ ዑፃ ዳኣሢ ባኦጮ ሳዖ ባንሢ ዳካዛ ሳዓ ጮኦሪንቴኔ።
*

17 ዩያጉዲ ሜሌ" ከኢታንቻ ሃሣ ጮሪንጫ ዓኣ፡ ጌኤዝ
ማኣራፓ ከሰኬኔ፤ ዒዚያ ዓጮ ባኣቺ ዔኪ ዓኣኔ።

18 ሜሌ" ጊንሣ ታሚ ዑፃ ቢታንቶ ዓኣ፡ ከኢታንቻ ያኦሲም ዒንጊ
ካኣሽኮ ቤዛፓ ከሰካዖ፡ ዓጮ ባኦጮ ዔኪ ዓኣ ከኢታንቻሢም፡-
«ሳዖይዳ ዓኣ ዎይኖ ዓኣፖኮ ካዒያ ሶያ ዔርዛሢሮ ሳዖይዳፓ ዎይኖ
ቲቂ ቲቂ ዔኬ» ጌዒ ዴኤፒ ዑኡሲና ዒላቴኔ። 19 ከኢታንቻሢ
ዒማ"ና ባኦጮ ሳዖ ባንሢ ዳኪ ዎይኖኮ ሶዮ ቲቂ ቲቂ ዔኬሰካፓ
ያኦሲ ዳጎና ዎይኖ ሄ'ርቂ ጩኡጳ ቤዛ ዓጌኔ። 20 ዩይ ዎይኖ ካታሞኮ
ዙላ"፡ ዎይኖ ሄ'ርቂ ጩኡጳ ቤዛ፡ ጩኡጳንቴኔ፤ ዩካፓ ከሰኬ ሱጉፃ
ሓይሣ ዋዳ ማዓንዳያ ሳዓፓ ዴ'ጊ ጌዔኔ፤ ሃሣ ሱጉፃ ጎዒ ዴንዴ
ዖድሱማ ሃይሣ ፄኤታ ሺያ ታኣካ" ሄላ"ያ ማዔኔ።

15

ጋፒንያ ማዔ ባይዛ ባኮ ዔኪ ዓኣ ከኢታንቻንሢ

1 ዩካፓ ሜሌ" ዴኤፒ ሃሣ ዲቃሢ ሄርሺሳ ማላታ ጫሪንጫ ታ
ዛጌኔ፤ ዩይያ፡- ያኦሲ ዳጋ" ዔያቶና ኩማያ ማዔ፡ ለንካይ ባይዛ
ባኣዚ" ዔኪ ዓኣ፡ ለንካይ ከኢታንቻ ታ ዛጌኔ።

2 ዒማ"ና ሃሣ ታሚ ሲኢሪንቴያ ለማሌኤሼ ባዚ" ማላያ ታ
ዴንቄኔ፤ ዒኣኣካ ባዙ" ዓጫ ቦዓሢና ቦዓሢኮ ማላቶና ሃሣ ዒዛ
ሱንያፓይዶ" ዖሊ ባሼ ዓሳ ዔቂ ዓኣንቴ ታ ዴንቄኔ፤ ዔያታ ያኦሲዳፓ
ዒንጊንቴ ጎኦላ" ዔኪ ዓኣኔ፤ 3 ዔያታ ያኦሲም ማዳ፡ ሙሴ ዓይኦሞና
ማራዓሢናኮ ዓይኦሞ፡-

«ቢያ ባኣዚ" ዳንዳዓ ጎዳ ማዔ ያኣዛሢዮ!
ማዳ" ኔኤኮ ዴኤፒ ሃሣ ዲቃሢ ሄርሺሳያኬ፤

ሚርጌ ዴሮ"ኮ ካኣታ"ሢዮ!
ኔኤኮ ጎይፃ ፒዜ ሃሣ ጎኔኬ።

4 ጎዳሢዮ! ኔና ዒጊጩዎያ
ሓሣ ሱንያዎ ኔኤኮ ቦንቹዎይ ዖናዳይ?

ኔኤኒ ሌሊ ዴማዴያኬ።
ኔኤኮ ፒዜ ማዳ" ፔጋዲ ዔርቴሢሮ
ዲሶ" ዴራ" ቢያ ሙኪ ኔ ቤርታ ኔኤም ዚጋንዳኔ»

* 14:16 ሳዓ ጮኦሪንቴኔ፡- ጌይንቴሢ ጋፒንያ ዎጎ ከሎ"ና ከኢታንቻ ሳዖይዳ ዓኣ ዓሳ
ዔኪ ያኦሲ ቤርቶ ሺኣሽንዳሢ ዛላ ከኤዞናያኬ። 14:20 ዒሲ. 63፡3፤ ዔር. ቃ
1፡15፤ ዮሐ. ያፔዳ 19፡15። 15:3 ከሲ. ማፃ 15፡1።

ጌሲ ጌሲ ዓይናዳኔ።

⁵ ይካፓ ሃሣ ዓፒላና ማዢንቴ፣ የኦሲም ዲማዳ፣ ጌኤሺ ማኣሪ ጫሪንጫ ቡሊ "ንቴ ዓኣንቴ ታ ዛጌኔ፤ ⁶ ዒማ"ና ለንካዋ ባይዛ ባኮንሢ ዔኪ ዓኣ፣ ለንካይ ኪኢታንቻ ጌኤዢ ማኣራፓ ኬሰኬኔ፤ ይያታ ዓኣፒዳ ዲካ ቦኦሪ ማኣዖ ማይንቴ ዓኣኔ፤ ሃሣ ዳዶ"ይዳኣ ዋርቄና ኮሺ "ንቴ ቃልሾ ቱኡቴ ዓኣኔ። ⁷ ዬኖና ያይዶ ባኮንሢዳፓ ፔቴ"ሢ ናንጊና ናንጋ ያኣዛሢኮ ዳጋ" ኩሚ ዓኣ፣ ዋርቆና ኮሺ "ንቴ ለንካይ ዑሺ ዓንጊ ለንካዋ ኪኢታንቻንሢም ዒንጌኔ፤ ⁸ ሃሣ ጌኤዢ ማኣራ የኦሲኮ ቦንቸና ዋልቆናይዳፓ ኬሰካ ጨቡ"ና ኩሜኔ፤ ለንካዋ ኪኢታንቻንሢኮ ለንካዋ ባይዛ ባኮንሢ ማዳንቴ ኩማንዳያ ሄላ"ንዳኣና የኦኒያ ጌኤዢ ማኣሮ ጌላኒ ዳንዳዒባኣሴ።

16

የኦሲኮ ዳጋ" ኩሜ ለንካዋ ዑዢ ዓንጎ

¹ ይካፓ ለንካዋ ኪኢታንቻንሢም ዴኤፒ ዑኡሲና፡- «ዓኣዲዋቴ! የኦሲኮ ዳጋ" ኩሜ፣ ዑዢ ዓንጎይዳ ዓኣ ዑዢ ሳይይዳ ላኣሉዋቴ» ጌኤዢ ማኣራፓ ጋዓንቴ ታ ዋይዜኔ።

² ዒማ"ና ቤርታሳ ኪኢታንቻሢ ዴንዳዖ፣ ዑዢ ዓንጎይዳ ዓኣ ዑዢ ሳይይዳ ላኣላዛ ቦዓሢኮ ማላቶ ዔኪ ዓኣ ዓሶና ይያ ማላቶም ዘጊ ካኣሽካ ዓሶናይዳ ፑርታ ሜታሳ ኪሢ ኬዴ"ኔ።

³ ላምዓሳ ኪኢታንቻሢ ዑዢ ዓንጎይዳ ዓኣ ዑዢ ባዘ" ዋኣይይዳ ላኣላዛ፣ ዋኣዓ ሓይቄ ዓሲ ሱጉሢጉዲ ካርቴ ሱጉሢ ማዔኔ፤ ባዘ"ይዳ ዓኣ፣ ሺምፔና ናንጋ ባካ ቢያ ሓይቄኔ።

⁴ ሓይሣሳ ኪኢታንቻሢ ዑዢ ዓንጎይዳ ዓኣ ዑዢ ዋሮ ዋኣዖንታ ዓልቃ ዋኣዖንታይዳ ላኣላዛ፣ ይይያ ሱጉሢ ማዔኔ፤ ⁵ ይካፓ ዋኣዖ ዑዓ ቢታንታ ዓኣ፣ ኪኢታንቻሢ፡-

«ሓሢያ ዓኣያ ሚናፓ ናንጋ ዲማዳ ጎዳሢዮ!

ሓያይዲ ኔ ዋጌሢሮ

ኔኤኒ ዒሎ"ኬ፤

⁶ ዓሳ ኔኤም ዲማዳዘንሢንታ ኔ ማሊያ ኬኤዛዘንሢያ

ዋዲ ሱጉዖ ላኣሌሢሮ

ኔኤኒ ዔያቶ ሱጉሢ ዑሺ"ኔ፤

ዬይ ዔያቶም ኮይሳያኬ»

15:4 ዔር. 10፥7፤ ዓይኑ. 86፥9።

15:5 ኬሲ. ማፃ 38፥21።

15:8 ኬሲ.

ማፃ 40፥34፤ 1ካኦቶ". ማ 8፥10-11፤ 2የኦሲ. ዓሃኬ 5፥13-14፤ ዒሲ. 6፥4።

16:2

ኬሲ. ማፃ 9፥10።

ጋዓንቴ ታ ዋይዘኔ።

⁷ ዬያጉዲ ሃሣ ያኦሲም ዒንጊ ካኦሽኮ ቤዘይዳ፡-

«ሂዮ፤ ቢያ ባኦዚ" ዳንዳዓ ጎዳ ማዔ ያኦዛሂዮ!

ኔኤኮ ዋጊዳ ጎኔ፤ ሃሣ ፒዜኬ» ጋዓ ዑኡሲ ታ ዋይዘኔ።

⁸ ያይዳሳ ኪኢታንቻሂ ዑዝ ዓንጎይዳ ዓኣ ዑዝ ዓባ" ላኣላዛ፤
ዓባ"ም ዓሶ ዓዳ" ታሚጉዲ ሚቻንዳ ዋልቄ ዒንጊንቴኔ፤ ⁹ ዬያሮ ዓሳ
ዴኤፒ ሩኡጸና ሚቸንቴኔ፤ ዬንሂ ሳይዛ ባኮንሂ ዑዳ ቢታንቶ ዓኣ፤
ያኦዛሂኮ ሱንዮ ዔያታ ጫሽኬኔ፤ ጎሞ ፔኤኮ ቡኡዲ፤ ዒዛ ቦንቹዖዋ
ዔያታ ዒዴ።

¹⁰ ዶንጋሳ ኪኢታንቻሂ ዑዝ ዓንጎይዳ ዓኣ ዑዝ ቦዓሂኮ
ካኦቱሞ ያይቶይዳ ላኣላዛ፤ ቦዓሂኮ ካኦቱማ ዴሚ ማዔኔ፤ ዓሳ
ኮሺ" ሜታዲ ሜታሂዳ፡ ዔቄያና ዒንዲርዘ ፔኤኮ ዳዓኔ፤ ¹¹ ሐሣ
ዔያቶኮ ሜታዲዮና ኪዳዲያናይዳ፡ ዔቄያና ጫሪንጮ ያኦዛሂ
ዔያታ ጫሽኬኔ፤ ዔያታ ማዴ፤ ዳቢንቶ ቡኡዲባኣሴ።

¹² ላሃ"ሳ ኪኢታንቻሂ ዑዝ ዓንጎይዳ ዓኣ ዑዝ ዴኤፖ ዋሮ፤
ዔፕራዲሴይዳ ላኣላዛ ዓባ" ኬሰካ ዛላ"ፓ ሙካ ካኦቶ"ም ጎይሂ
ማዓንዳጉዲ ዋሮ ዋኦፃ ሚጨኔ። ¹³ ዴኤፖ ሸኦዝሂ ዳንጎና ቦዓሂ
ዳንጎና ሃሣ ሉኡዙሞና ያኦሲ ማሊዖ ኬኤዛያ ማለሳሂ ዳንጋፓ
ፓንቆ ማላ፤ ሐይሦ ፑርታ ዓያና ኬሰካንቴ ታ ዛጌኔ። ¹⁴ ዔያታ ዲማ
ዓኪ ባኦዚ" ማዳ ያላሄ ዓያናኬ፤ ዬንሂ ሐይሦ ዓያኖንሂ ቢያ ባኮ
ዳንዳዓ ያኦዛሂኮ ዴኤፖ ኬሎ"ና ኬሰካንዳ ያሎም ዓሶ ቡኡሳኒ
ዓጮ" ካኦቶ" ቢያሂ ባንሂ ዓኣዳኔ።

¹⁵ «ታኣኒ ዉሲጉዲ ዔሩዋንቴ ዬዓንዳኔ፤ ካሎ" ማዑዋጉዲና
ካሎ"ሞዋ ዓሲ ዛጉዋጉዲ ጴጪ ፔኤኮ ማኣዓሂ ካፓሂ ዓንጆ ዋዛ
ዴንቃንዳኔ»

¹⁶ ዬንሂ ዓያኖንሂ ዓጮ" ካኦቶ" ቢያ ዔብሬ ዓሶ ሙኡቹና
ዓርማጌዶኔ ጌይንታ ቤዘይዳ ቡኡሲ ያሎም ጊኢሊሽኔ።

¹⁷ ላንካሳ ኪኢታንቻሂ ዑዝ ዓንጎይዳ ዓኣ ዑዝ ዠባሮይዳ
ላኣላዛ፤ ጌኤዝ ማኦራ ዓኣ ካኦቱሞ ቤዛ፡- «ዓካሪ ቢያ ባካ
ማዳንቲ ኩሜኔ!» ጋዓ ዴኤፒ ዑኡሲ ዋይዘንቴኔ። ¹⁸ ዒማ"ና
ዘኤለንሂ ዘኤለንሂኔ፤ ዴኤፒ ዑኡሲያ ዋይዘንቴኔ፤ ጉጉንሂ
ጉጉንሂኔ ሃሣ ሳዓኣ ሚርጌና ዓጊዴኔ፤ ዬያጉዴ ሳዓ ዓጊዴሂ ዓሲ
ማዠንቴማፓ ዓርቃዖ ዓጊዳ ቤቂባኣሴ። ¹⁹ ዴኤፖ ካታሜላ ሃይሦ
ቤሲ ዶዲ ዶዲ ፓቂንቴኔ፤ ሜሌ" ዓጮ" ዓሶ ካታማኣ ቢያ ዶዔኔ፤

16:15 ማቴ. 24፡43-44፤ ሉቃ. 12፡30-40፤ ዮሐ. ያፔዳ 3፡3። **16:16** 2ዮሐሴ.
ዓሃኬ 23፡29፤ ዛካ. 12፡11። **16:18** ዮሐ. ያፔዳ 8፡5፤ 11፡13፤ 19።

ያሕሲ ዴኤፖ፡ ባብሎኔ ካታሜሎ ጳቂሢ ዒዛኮ ዴኤፖ ዳጎ ዑዠ ኩንሦና ዑዠ ዑሽካንዳጉዲ ዒዞም ዒንጌኔ። 20 ዋኣዖ ሳዛ" ዓኣ ዓጮ" ዓኣዲ ባይቄኔ፤ ሃሣ ዲካ"ኣ ቢያ ዓኣ ቤዛፓ ባይቄኔ። 21 ዴኤሠማ ፔቴ" ዴኤፒ ዋንሢ ሹቺጉዴ ሻቺ ጫሪንጫፓ ዓሶይዳ ኬዴ"ኔ፤ ዬይ ባይዞም ዳኪንቴ ባካ ሚርጌ ካራ ባይዚ ሜታሴያ ማዕሢሮ ዓሳ ያሕሲ ጫሽኬኔ።

17

ዘኣሰካ ኮኣማ ላኣሊ

1 ላንካዎ ዑዠ ዓንጎ ዓኪ ዓኣ፡ ላንካዎ ኪኢታንቸንሢፓ ፔቴ"ይ ታ ባንሢ ሙካዖ ታኣም፡- «ሓኒ ሙኬ፤ ሚርጌ ዋኣዖ ዑፃ ዴዒ ዓኣ፡ ዘኣዛ ኮኣማ ላኣሊሎም ዒንጊንታንዳ ሜታሢ ታ ኔና ዳዋንዳኔ፤ 2 ዓጮ" ካኣታ" ዒዞና ዋላ" ዘኣዛ ኮኣሜኔ፤ ሃሣ ዓጮ"ይዳ ናንጋ ዓሳ ዒዞኮ ዬያ ፑርቶ ሱኡኮ ማዶ" ዑዠና ማሢንቴ፤» ጌዒኔ።

3 ዬካፓ ኪኢታንቸሢ ዓያና ጌኤሺ ማሊያይዳ ታና ጌልዚ፡ ዓሲ ናንጉዋ ዳውሎ" ዓኪ ዓኣዴኔ፤ ዒኢካ ጫሺ ዑይይዳ ቢያ ፃኣፒንቴ ዓኣ፡ ላንካይ ቶኦኪና ታጾ ጉራኒና ዓኣ፡ ዘቂ ቦያሰኬያኮ ዑፃ ዴዒ ዓኣ ፔቴ" ላኣሊ ታ ዴንቄኔ። 4 ላኣሊላ ጮልዒ ዲንኪ ማኣዖና ዘቂ ማኣዖና ማይንቴ ዓኣኔ፤ ጊንሣ ዋርቄና ዴማ ዴማ ሚዛጾ ሹጮና ፓልሚንቴ ዓኣኔ፤ ኩጮይዳ ሃሣ ዒዛ ሻኣካ ባኣዚ"ና ዒዞኮ ፑርቶ ሱኡኮ ማዶ"ና ኩሜያ፡ ዋርቄና ኮሺ"ንቴ ዑሺ ዓንጌ ዓኪ ዓኣኔ። 5 ዒዞኮ ባሊቶይዳ፡- «ዘኣዛ ኮኣማ ዓሶና ዓጮ"ይዳ ፑርቶ፡ ዒኢቴ ማዶ"ናኮ ዒንዶ ማዕ ዴኤፖ ካታሜሎ ባብሎኔ» ጌይንታያ ዓኣሺንታያ፡ ዒርቱዋ ሱንሢ ፃኣፒንቴ ዓኣኔ። 6 ዬና ላኣሊላ ያሕሲም ዴማዴ ዓሶኮ ሱጉያና ዬሱሰ ኪሪሰቶሴ ዛሎ" ማርካዳ ዓሶኮ ሱጉያና ማሢንቴ ዓኣንቴ ታ ዛጌኔ፤ ታ ዒዞ ዴንቃዖ ሚርጌና ዲቃቴ ሄርሼኔ። 7 ኪኢታንቸሢ ጋዓንቴ ታኣም፡- «ዓይጎሮ ኔ ዲቃቴ ሄርሻይ? ላኣሊሎና ዒዛ ዴዒ ዓኣ፡ ላንካዎ ቶኦኮ"ና ታጾ ጉራኖና ዓኣ ቦዓሢኮ ዓኣሺንታያ ማዕ ዒርቱዋ ባኮ ታ ኔኤም ጋፒሲ ኬኤዛንዳኔ፤ 8 ኔኤኒ ዛጌ ቦዓሢ ቤርታ ዓኣያኬ፤ ሃሢ ጋዓንቴ ባኣሴ፤ ሃጊ ዴኤፖ፡ ዒጊቻ ዒቶይዳፓ ኬሰኪ ባይቆሮ ዓኣዳንዳኔ፤ ዒማ"ና ሳዓ ማዢንቴማፓ ዓርቃዖ ሱንፃ ናንጎ ማፃኣፖይዳ ፃኣፒንቴባኣያ፡

16:19 ዒ.ሲ. 51፡17። 16:20 ዮሐ. ያፔዳ 6፡14። 16:21 ኬሲ. ማፃ 9፡23፤

ዮሐ. ያፔዳ 11፡19። 17:1 ዒ.ር. 51፡13። 17:2 ዒ.ሲ. 23፡17፤ ዒ.ር. 51፡7።

17:3 ዮሐ. ያፔዳ 13፡1። 17:4 ዒ.ር. 51፡7።

ሳይይዳ ናንጋ ዓሳ፡- ቦዓሢ ቤርታ ዓኣያ፤ ሃሢ ጋዓንቴ ባኣያ ጊንፃፓ ሙካንዳያታሢ ዛጋያ ዲቃቲ ሄርሻንዳኔ።

9 «ዔሪ ማላ ዒኔና ዓኣያ ማዓኒ ኮይሳሢ ዒማ"ናኬ፤ ላኣሌላ ዴዒ ዓኣ ቶኦኮ"ንሢ ላንካይ ዲካኬ፤ 10 ዔያታ ላንካይ ካኣቶ"ኬ፤ ዔያቶይዳፓ ዶንጋሢ ሎኦሜኔ፤ ፔቲ"ሢ ሃሢ ዓኣኔ፤ ሳጋሢ ጋዓንቴ ሃጊ ሙከባኣሴ፤ ዒ ሙካዖ ካኣታዲ ዴዒኒ ኮይሳሢ ዳካ" ዎዴሮ ሌሊኬ። 11 ቤርታ ዓኣያ፤ ሃሢባኣ ቦዓሢ ሳላ"ሳ ካኣታ"ሢኬ፤ ዒዚ ላንካዎ ካኣቶ"ንሢፓ ፔቲ"ሢኬ፤ ዒዚያ ባይቆሮ ዓኣዳኔ።

12 «ኔኤኒ ዛጌ ታጾ ጉራና ሐጊ ካኣታዲባኣ፤ ታጾ ካኣቶ"ኬ፤ ጋዓንቴ ኮሺ" ዳካ" ዎዴ ቦዓሢና ዎላ" ካኣታዳንዳ ቢታንቶ ዔያታ ዴንቃንዳኔ። 13 ዬንሢ ካኣቶ"ንሢኮ ማሊፃ ፔቲ"ኬ፤ ዔያታ ፔኤኮ ዎልቆና ቢታንቶና ቦዓሢም ዒንጋንዳኔ፤ 14 ዬያታ ማራዒሢና ዎላ" ያልታንዳኔ፤ ጋዓንቴ ማራዒሢ ጎዳቶኮ ጎዳ ሃሢ ካኣቶ"ኮዎ ካኣቲ ማዔሢሮ ያሎና ዔያቶ ባሻንዳኔ፤ ዒዛና ዎላ" ዓኣ፤ ዔኤሊ"ንቴዘንሢንታ ዶኦሪንቴዘንሢንታ ሃሢ ጉሙርቂንታዘንሢያ ያሎና ባሻያ ማዓንዳኔ» ጌዔኔ።

15 ሐሣ ኪኢታንቻሢ ታኣም፡- «ዘኦዛ ኮኦማ ላኣሌላ ዴዒ ዓኣንቴ ኔ ዛጌ ዎኣዖ ዴማ ዴማ ዜርሢ፤ ቶኦኪ፤ ዴዒ ሃሢ ዴማ ሙኡቹ ጌሰታ ዲቢ ዓሲኬ፤ 16 ቦዓሢና ኔ ዛጌ ታጾ ጉራናንሢና ዬኖ ዘኦዛ ኮኦማ ላኣሌሎ ዒዲ፤ ጉሪ ካሎ" ዒዘ ዓይሳንዳኔ፤ ዒዘኮ ዓሽኮዎ ሙዒ፤ ታሚና ዒዘ ዔያታ ሚቻንዳኔ። 17 ያኦሲ ፔኤኮ ማሊፃ ዔያታ ኩንሣንዳጉዲ ዬያ ዔያቶ ዒኖይዳ ጌሢኔ፤ ዓይጎሮ ጌዔቴ ያኦሲ ቃኣላ" ማዲንቲ ኩማንዳያ ሄላ"ንዳኣና ዔያታ ፔቲ" ማሊሢና ዎላ" ጊኢጊ፤ ዔያቶኮ ካኣቲዎ ቢታንቶ ቦዓሢም ዒንጋንዳጉዲኬ።

18 «ዬና ኔ ዛጌ ላኣሌላ ዓጮ" ካኣቶ" ዑፃ ካኣታዳንዳ፤ ዴኤፖ ካታሜሎኬ» ጌዔኔ።

18

ባብሎኔ ካታሞኮ ሎኦሚያ

1 ዬካፓ ሃሢ ዴኤፒ ቢታንቶ ዓኣ፤ ሜሌ" ኪኢታንቻሰኬይ ጫሪንጫፓ ኬዳ"ንዳቴ ታ ዛጌኔ፤ ዒዛኮ ቦንቾ ፖያ ሼኤሪፃፓ ዔቂያና ሳዓ ፖዔኔ፤ 2 ዒዚ ዴኤፒ ዑኡሲና፡-

«ዴኤፖ፤ ባብሎኔ ካታሜላ ሎኦሜኔ! ሎኦሜኔ!

ፃላሄኮዎ ናንጊ ቤሲ ማዔኔ!

ሃሣ ፑርቶ ዓያኖኮዋ ዋይሢ ቤሲ ማዔኔ፤

ፑርታ ሃሣ ሻኣካያ ማዔ፥ ካፖኮ ቢያ

ዋይሢ ቤሲ ማዔኔ።

3 ዴራ" ቢያ ዒዘኮ

ፑርቶ ሱኡኮ ማዶ" ዑዡ ዑሽኬኔ፤

ዒጮ" ካኣታ" ዒዘና ዋላ" ዘኣዛ ኮኣሜኔ፤

ሃሣ ዒጮ" ይዳ ኮርሞ ኮርማ ዓሳኣ

ዑሣ ዓኣዳ ዒዛ ሳኣ ናንጊም ጊኢጋያታሢሮ ያርሳጩኔ»

ጌዒ ዒላቴኔ።

4 ሐሣ ሜሌ" ዑኡሲ ጫሪንጫፓ፡-

«ታ ዴሬዮቴ! ዒዛ ማዶ ሳሞ ዒንሢ ማዶዋጉዲ

ዒዘም ዓሳና ባይሲንቶና ዒንሢያ ባይቁዋጉዲ፤

ዒዘይዳፓ ኬሰኩዋቴ።

5 ዓይሳሮ ጌዔቴ ሳማ ዒዘኮ ኩለንቲ

ጫሪንጫ ሄሌ"ሢሮ

ያኦሲ ዒዘኮ ፑርቱሞ ጳቂሣሢሮኬ።

6 ዒዛ ዒንጌማጉዲ ማሂ ዒንጉዋቴ፤

ዒዛ ማዶ ማዶ"ኮዋ ጳንጩ ዒዘም ማሁዋቴ፤

ዒዛ ሲኢሪ ዒንጌ ዑዡ፥ ጳንጩ ማሂ

ሲኢሪ ዒዘም ዒንጉዋቴ።

7 ዒዛ ፔና ቦንቺሲ ሳኣ ናንጊም ጊኢጋያ ማሄማጉዲ

ዒዘ ሜታሲ ያዴሱዋቴ፤

ዒዛ ፔኤኮ ዒኖና፡-

«ታኣኒ ካኣቲ ማዒ ዴዔኔ፤

ዓኒ ታኣኮ ሓይቂያቴዋሴ፤

ፔቴ"ታዖ ያዴያ ታ ያዴዋሴ»

ጌዒ ጌዒ ሄርሺንታኔ።

8 ዬያሮ ዒዘም ዓሳና ባይሲንታ

ፔቴ" ኬሊ" ዒዘ ሄላ"ንዳኔ፤

ሓይቢና ያዴሢና ናይዚና ዒዘ ሄላ"ንዳኔ፤

ዒዘይዳ ዋጋ ሳዳ ማዔ ያኣዛሢ ዴኤፒ ማዔሢሮ

ታሚና ዒዘ ሚቺንታንዳኔ»

ጋዓንቴ ታ ዋይዜኔ።

18:2 ዒሲ. 13፥21፤ 21፥9፤ ዒር. 50፥39፤ 51፥8፤ ዮሐ. ፪፻፲፭ 14፥8። **18:3** ዒሲ.

23፥17፤ ዒር. 51፥7። **18:4** ዒሲ. 48፥20፤ ዒር. 50፥8፤ 51፥6፤ 45። **18:5**

ማዢ. ማፃ 18፥20-21፤ ዒር. 51፥9። **18:6** ዓይኑ. 137፥8፤ ዒር. 50፥29።

9 ዒዛና ዋላ" ዘኣዛ ኮአሚ፡ ጊኢጋ ናንጊ ናንጌ፡ ሳፆ ካኣታ" ዒዛ ሚቸንታ ዋድ"ና ኬሰካ ጨቦ" ዛጊ ዒዘር ዒላቲ ዒላቲ ዩኤካንዳኔ።

10 ዒያታ ዒዘይዳ ሄሌ" ሜታሢ ዛጎ ዒጊጨ፡ ሃኬ ዒቁ፡-

«ኔኤኒ ሐና" ደኤፖ ካታሜሌ!

ኔኤኒ ሐና" ፑኤፒ ማዔ፡ ባብሎኔ!

ፑርቶ ዋጋ" ኔ ጊዳ" ዑከና ሙከሢረ

ባዴዔ ኔና! ባዴዔ ኔና!»

ጋዓንዳኔ።

11 ዒያቶኮ ዋኣዖ ካአሚላ ጫኣኔ ባኮ ሃካፓ ሴካ ሻንቃ ዓሲ ባኣሢሮ፡ ሳፆይዳ ኮርሞ ኮርማ ዓሳ ዒዘ ዛሎ" ዩኤከ ያያንዳኔ፤

12 ዒያታ ዋኣዖ ካአሚሎይዳ ጫኣኔ ባካ፡- ዋርቁ፡ ቢራ ዓንጊ፡ ቦንቸንታ ሹቹ፡ ሚዛጲ ሹቹ፡ ቦኦሬ ሻኣዣ ዓፒላ፡ ጮልዔ ዲንኪ ማኣዓ፡ ሱኡፔ ዓፒላ፡ ዘቁ ዓፒላ፡ ቃራ ሳውቃ ዱማ ሚሢ፡ ዳርሲ ዓቸንታ ሚርጌ ሚኢሼ ዒካ ሚሢንታ ሞኦና ዓንጊንታ ሜሌ" ዓንጎንታ ቦኦሬ ሚዛጲ ሹጮንታይዳፓ ኮሺ"ንቴ ባካ ቢያ፡ 13 ሳውቃ ሚሢ ቁኡሪ፡ ዱማ ዱማ ሳውቃ ደኤሻ፡ ካርቤ፡ ቲሺ፡ ዑንጃ፡ ዋይኖ ዑዣ፡ ሪሚቶ ዛይታ፡ ሺኢቹ ዲኢሊ፡ ዛርጌ፡ ባይ፡ ማራይ፡ ፓራ፡ ሳርጌላ ያይታ፤ ዩያጉዲ ሃሣ ዓይሎ" ማዔ ዓሶንታ ፖሎና ዲዒ ዒኮና ዓሶንታኬ።

14 ዩንሢ ኮርሞ ኮርማዘንሢ፡- «ኔኤኒ ናሽካ ኮዣ ባካ ቢያ ኔ ጊዳ"ፓ ቤቲ፡ ዴንዴኔ፤ ኔኤኮ ያርጎቹሞና ፓልሞና ቢያ ባይቁኔ፤ ማይ ዩይ ባካ ኔኤም ጊንሣ ጴዳዓኬ» ዒዘም ጋዓኔ።

15 ዩያ ባኮ ዒዘይዳፓ ሻንቁ ኮርሚ ያርጎጮ ኮርማ ዓሳ ዒዘይዳ ሄሌ" ሜቶ" ዒጊጨሢና ሃኬ ዒዘኮ ዒቃንዳኔ፤ ሃሣ ዒያታ ዒዘ ዛሎ" ዩኤከ ዩኤከ ያያንዳኔ፤ 16 ዑኡዘዋ ዒያታ ዴጊዲ፡-

«ሻኣዣ ዓፒሎንታ ዳንኮ ዘቁ ዓፒሎንታ ማይንታዘ

ዋርቆና ሚዛጲ ሹጮና ፓልሚንቴዘ

ዴኤፖ፡ ካታሜሎ ባብሎኔም ባዴዔ! ባዴዔ!

17 ዩይ ቆላ" ቢያ ኔጉዋዖ ኔኤኮ ባይቁባይ!» ጋዓንዳኔ።

ዋኣዖ ካአሚሎኮ ሱኡጋ ቢያ፡ ዋኣዖ ካአሚሎ ቶጊ ዓኣዳ ዓሳ ቢያ፡ ዋኣዖ ካአሚሎይዳ ማዳ ዓሶንታ ባዘ" ዑፃ ሃንቲ ሃንቲ ኮርማ ዓሳ ቢያ ዒዘኮ ሃኬ ዒቃንዳኔ፤ 18 ዒዛ ሚቸንታኣና ኬሰካ ጨቦ" ዛጋዖ፡- «ሃኖ' ደኤፖ ካታሜሎጉዴያ ሜሌ" ካታማ ዋካዳይ?» ጌይ ጌይ ዒያታ ዒላቲኔ። 19 ሃሣ ዒያታ ፔኤኮ ቶኦካ" ሲላሊ ዋሂ፡ ያዩ ዩኤከ ዩኤከ፡-

18:10 ሂዚ. 26፡16-17። 18:11 ሂዚ. 27፡31-36። 18:13 ሂዚ. 27፡12፤

13፤ 22። 18:15 ሂዚ. 27፡31፤ 36። 18:17 ዒሲ. 23፡14፤ ሂዚ. 27፡26-30።

18:18 ሂዚ. 27፡32።

«ባዘ"ይዳ ዋኦያ ካኦሚላ ዓኣ ዓሳ ቢያ

ዒዘ ቆሎ"ና ያርጎጩ ዓሳ

ዴኤፖ ካታሚላ ዑኩና፥ ኔጉዋዎ ባይቄሢሮ

ባዴዔ! ባዴዔ!

20 ጫሪንቺዮ! ዒዛ ባይቄሢሮ ዋዛዴ፤

ዒንሢ ያኦሲም ዲማዴዘንሢና ያኦሲ ማዶ"ም ዳኪንቴዘንሢዮ

ሐሣ ያኦሲ ማሊያ ኬኤዛዘንሢዮ ዋዛዴዋቴ፤

ዓይጎሮ ጌዔቴ፡-

ያኦሲ ዒንሢዳ ዒዛ ሄሊ"ሴ ሜቶ"ሮ ጌዒ

ዒዘ ፑርታና ዋጌ።» ጌይ ጌይ ዒላቴ።፡

21 ዬካፓ ሃሣ ፔቴ" ዴኤፒ ኪኢታንቻሰኬይ ፑኡፒ ዋንሢ

ሹቺጉዴ ሹቺ ዔኪ ባዘ"ይዳ ኬኤራዎ፡- «ዴኤፖ ካታሚላ፥ ባብሎኔ

ሐኣዲዲ ዋልቄና ኬኤሪንታንዳ፤ ሐካፓ ሴካ ዒዛ ጴዳዓኬ፤

22 ጎኦሎ" ዋርቃ ዓሶንታ ዓይኑም ዓይናዳ ዓሶ ዑኡዛ

ሹሉንጎንታ ዛያሢንታ ዋርቃ ዓሶ ዑኡዛ

ላሚ ኔ ጌዳ" ማይ ዋይዚንታዓኬ፤

ዲማ ዲማ ባኣዚ" ሃኦማቶና ማዳ ዓይጎ ዓሲያ

ሃይፓ ሴካ ኔ ጌዳ" ጴዳዓኬ፤

ዋንሢ ዋዲንታያኣ ማይ ኔ ጌዳ" ዋይዚንታዓኬ።

23 ፖዓ፥ ፖዒያ ኔ ጌዳ"

ሐይፓ ሴካ ፖዓዓኬ፤

ዔፒ ሃይሴያ ሃይፓ ሴካ ኔ ጌዳ" ዋይዚንታዓኬ።

ኔ ዓጮ"ኮ ኮርሞ ኮርማ ዓሳ

ዓጮ" ቢያይዳ ዔርቴ ዴኤፖ ዓሶኬ፤

ኔኤኮ ማርሾና ዓሶ ቢያ ኔ ዳቢሼ።፡

24 ዒዘይዳ ያኦሲ ማሊያ ኬኤዛዘንሢዮ

ያኦሲም ዲማዴዘንሢዮ

ሳየይዳ ዋዲንቴ ዓሶኮዋ ቢያ ሱጉፃ ጴዴ፤» ጌዔ።፡

19

1 ዬካፓ ሚርጌ ዓሲ ዑኡሲ ማላ፥ ዴኤፒ ዑኡሲ ጫሪንጮይዳ፡-

«ያኦሲም ጋላታ!

ዳቂሺሢና ቦንቾና ሃሣ ዋልቄያ ኑ ያኦዛሢሮ ማዔ፤

18:19 ሂዚ. 27፥30-34።

18:20 ላሚ. ዋማ 32፥43፤ ዔር. 51፥48።

18:21

ዔር. 51፥63-64፤ ሂዚ. 26፥21።

18:22 ሂዚ. 26፥13፤ ዒሲ. 24፥8።

18:23

ዔር. 7፥34፤ 25፥10።

18:24 ዔር. 51፥49።

2 ዒዚ ዋጋ ዋጊፃ ጎኔ፤ ሃሣ ፒዜኬ።

ዘኦዛ ኮኦሚዎና ሳዎ ዒኢሴ

ዘኦዛ ኮኦሚ ዴኤፔሎ ፑርታና ዒ ዋጌ፤

ዒዘ ፑርታና ዋጊዎና

ዒዘም ማዳ ዓሶኮ ሱጉዎ ማሄኔ፤

3 ላሚ ሃሣ

የኦሲም ጋላታ! ዒዘይዳፓ ጨባ" ናንጊና ጨቢ ጨቢ ኬሰካኔ»

ጋዓ ዑኡሲ ታ ዋይዜኔ።

4 ዒሚ"ና ላማታሚ" ያይዶ ጋርቾንሢና ያይዶ ባኮንሢ ካኦቱሞ ያይታ" ዴዒ ዓኦ፤ ያኦዛሢም ባሊቶና ሳዎ ባንሢ ሂርኪ ጌይ፡- «ዓኦሚን፤ ያኦሲም ጋላታ!» ጌዒ ጌዒ ዚጌኔ።

ማራዓሢኮ ዔፖ ሙዎ

5 ዬካፓ፡-

«ዒዛ ዒጊጨ፤ ዒዘም ማዳ

ዳኮ"ንታ ዴኤፖንታ ቢያ

ኑ ያኦዛሢ ጋላቱዋቱ!»

ጋዓ ዑኡሲ ካኦቱሞ ያይታ" ዓኦ ቤዛፓ ዋይዚንቴኔ።

6 ሃሣ ጊንሣ ሚርጌ ዓሲ ዑኡሲ፤ ዴኤፔ ዋታ" ዋርዚ ዋኦሢና ዴኤፔ ጉጉንሢ ዑኡሲ ማላ ዑኡሲ፡-

«ቢያ ባኦዚ" ዳንዳዓ ጎዳ ማዔ ያኦዛሢ

ካኦታዴሢሮ ጋላቱዋቱ!

7 ማራዓሢኮ ዔፓ ሄሌ"ሢሮ

ዒዛኮ ዑኡቴላ ጊኦጊንቴሢሮ

ዋዛ ኑም ማዎንጎ፤ ኑ ዋዛዶም፤

ቦንቺያ ዒዛ ኑ ቦንቾም።

8 ዓኦፒዳ ዴካያ፤ ጌኤሺ ማዔ

ሻኦዢ ዓፒላ ማይንታንዳጉዲ ዒዘም ዒንጊንቴኔ፤

ዬይ ቦኦሬ ሻኦዢ ዓፒላ ያኦሲም ዴማዴ ዓሶኮ

ዒሉ"ሞ ማዶ"ኬ» ጋዓንቴ ታ ዋይዜኔ።

9 ከኢታንቻሢ ሃሣ፡- «ማራዓሢኮ ዔፖ ሙዎም ዔኤሊ"ንቴ ዓሳ ባሊቱና ዓኦያኬ» ጌይ ያኦፔ» ታኦም ጌዔ፤ ሄሊ"ሳዎ ሃሣ፡- «ሐይ ያኦሲኮ ጎኔ ቃኦላኬ» ጌዔ።

19:2 ላሚ. ዋማ 32፥43፤ 2ካኦቶ". ማ 9፥7።

19:3 ዒሲ. 34፥10።

19:5

ዓይኑ. 115፥13።

19:6 ሂዚ. 1፥24፤ ዓይኑ. 93፥1፤ 97፥1፤ 99፥1።

19:9 ማቲ.

22፥2-3።

10 ታኣኒ ይያ ኪኢታንቻሂም ዚጋኒ ዒዛ ቶኮ ዴማ" ባሊቶና ሂርኪ ጋዓዛ፡ ዒዚ ጋዓንቴ፡ «ሃሼ"! ሓያይዲፕ! ታኣኒያ ኔናንታ ዬሱሴ ዛሎ" ማርካዳ ዒሸንሂንታ ዎላ" ማማዳያኬ፤ ያኦሲም ዚጌ፡፡

«ዬሱሴ ፔጋሲ ጳጳሳ ጎኑማ ያኦሲ ማሊያ ኬኤዛ ዓሶ ዳንጎና ኬኤዛ ዓያኖኬ» ጌዔኔ፡፡

ቦኦሬ ፓራሂ ቶጊ ዓኣ ዓሂ

11 ዬካፓ ጫሪንጫ ቡሊ"ንቴም፡ ዒኢካ ቦኦሬ ፓሮ ታ ዴንቄኔ፤ ፓራሂ ቶጌሂ፡ «ጉሙርቂንታያ ሃሃ ጎኔ ዓሲ» ጌይንታያኬ፤ ዒዚ ፂሊ"ሞና ዎጋያ ሃሃ ያልታያኬ፡፡ 12 ዓኣፓ ዒዛኮ ዔኤታ ታሚ ማላኔ፤ ሃሃ ዒዛኮ ቶኦኮ"ይዳ ቦንቸሮ ዓጎ ባካ ሚርጌ ዓጊንቲ ዓኣኔ፤ ዒዛይዳፓ ዓታዛ ሚሊ" ያኣኒያ ዔፋዎያ፡ ፃኣፒንቴ ሱንሂ ዒዛይዳ ዓኣኔ፤ 13 ዒዚ ሱጉሂ ሄሊ" ፑርቲሴ ማእያ ማይንቲ ዓኣኔ፤ ዒዛኮ ሱንፃ «ያኦሲ ቃኣላ» ጌይንታያኬ፡፡ 14 ዒማ"ና ቦኦሬ ፓሮ ቶጌ፡ ቦኦሬ ጌኤሺ ዓፒላ ማይንቴ፡ ጫሪንጫ ዓኣ ያሎ ዓሳ ዒዛ ጊንያ ዓኣዳኔ፤ 15 ሚሊ" ዴሮ" ያሊ ባሻንዳ ዓጩ፡ ጩንቻ ዓፓሮ ዒዛኮ ዳንጋፓ ኬሰኬኔ፤ ዒዚ ሚጪንቱዎ ዕርቂ ዔያቶ ዎይሃንዳኔ፤ ሃሃ ዒዚ ቢያ ባኣዚ" ዳንዳዓ ያኣዛሂኮ ዴኤፖ ዳጎና ዎይኖ ሄርቂ ጩኤጾ ቤዛ ዎይኖ ሄርቃንዳኔ፤ 16 ዒዛኮ ማኣዓሂና ጉባዘ"ናይዳ፡ «ካኣቶ"ኮ ካኣቲ፡ ጎዳቶኮ ጎዳ» ጋዓ ሱንሂ ፃኣፒንቲ ዓኣኔ፡፡

17 ዬካፓ ሃሃ ፔቴ" ያኦሲኮ ኪኢታንቻ ዓቦ" ዑፃ ዔቂ ዓኣንቴ ታ ዛጌኔ፤ ዒዚ ጫሪንጫይዳ ባራና ካፖም ዴኤፒ ዑኡሲና፡ «ያኦሲ ጊኢጊሼ፡ ዴኤፖ ሙያ ሙዓኒ ቡኪንቱዎቴ፤ 18 ዒንሂ ቡኪንታሂ ካኣቶ" ዓሽኮ፡ ፖኦሊሶ ዓይሃ ዓሶ ዓሽኮ፡ ያሎ ያላ ዶዶ ዓሶ ዓሽኮ፡ ፓራሂ ቶጊ ያላ ዓሶና ፓራሂና ዓሽኮ፡ ዎይሃ ዓሶና ዴማ" ማዒ ዎርቃ ዓሶናኮ ዓሽኮ፡ ዳኮ" ዓሶና ዴኤፖ ዓሶና ዓሽኮ፤ ዬያጉዲ ዓሲ ቢያኮ ዓሽኮ ሙዓኒኬ» ጌይ ዒላቴኔ፡፡

19 ሓሃ ቦዓሂንታ ሳያ ካኣቶ"ንታ ፔኤኮ ያላ ዓሶና ዎላ" ቦኦሬ ፓራሂ ቶጌሂና ዒዛኮ ያላ ዓሶና ያልታኒ ቡኪንቲ ዓኣንቴ ታ ዛጌኔ፤ 20 ጋዓንቲ ቦዓሂ ዓዲንቴኔ፤ ሃሃ ዒዛና ዎላ" ዒዛ ቤርታ ዴማ ዴማ ዓኪ ባኣዚ" ማዳ፡ ሉኡዙሞና ያኦሲ ማሊያ ኬኤዛሂያ ዓዲንቴኔ፤ ዒዚ ቦዓሂ ማላቶ ዔኪ ዓኣዘንሂና ዬያም ዚጋዞንሂ ዴማ ዴማ ዓኪ ባኣዚ" ማዲ ዳዊሂና ዳቢሻኔ፤ ዒማ"ና ዬንሂ ላምዖንሂ

19:11 ሂዚ. 1፡1፤ ዓይኑ. 96፡13፤ ዒሲ. 11፡4፡፡ 19:12 ዳኣኔ. 10፡6፡፡

19:15 ዓይኑ. 2፡9፤ ዒሲ. 63፡3፤ ዒኖ. 3፡13፤ የሐ. ያፔዳ 14፡20፡፡

ሸምፔና ዓኣ ጎይሣ ዓኣነቴ ዔኤታ ታሞ ባዘ"ይዳ ዓጊንቴኔ።
 21 ዓቴዘንሣ ሃሣ ቦኦሬ ፓራሣ ቶጌ ዓሣኮ ዳንጋፓ ኬሰካ፥ ጨንቾ
 ዓፓራ ዋዴኔ፤ ዒማ"ና ካፓ ቢያ ዓሽኮ ዔያቶኮ ሙይ ሚሽኬኔ።

20

ሺዮ ሌዖ ካኣታዳንዶ ካኣቱሞ

1 ዩካፓ ሃሣ ዴኤፖ፥ ዓጊቻ ዔቶ ካሮ" ቡሎ" ቁልፔና ዴኤፒ
 ካኒ ቢራታና ዔኪ ዓኣ፥ ኪኢታንቸሰኬይ ጫሪንጫፓ ኬዳ"ንቴ ታ
 ዛጌኔ፤ 2 ዒዚ፥ ዴኤፖ ሾኦዣሣ ዓርቂ ሺያ ለዔ ቱኬ"ኔ፤ ዩይ
 ዴኤፖ ሾኦዣሣ ዲያብሎ፥ ሃሣ ጊንሣ ፃላሄ ጌይንቴ ቤርታኣ
 ሾኦዣሣኬ፤ 3 ዩይ ሺዮ ሌዓ ጋፓንዳያ ሄላ"ንዳኣና ማይ ዴሮ"
 ዳቢሹዋጉዲ ያኦሲኮ ኪኢታንቻሣ ዒዛ ዴኤፖ ዓጊቻ ዔታ" ዓጊ፥
 ካሮ" ያኦኒያ ቡሎ"ዋጉዲ ዔርዛ ማላቶና ዓይሣኔ፤ ጋዓንቴ ዩካፓ
 ዳካ" ዋዴም ዒ ቡሊ"ንታንዳያ ኮይሳኔ።

4 ዩካፓ ካኣታ" ዴዓ ሚርጌ ያይታ ታ ዴንቄኔ፤ ዩሮ ያይቶይዳ
 ዋጌ ዋጋኒ ቢታንቶ ዓጊንጊንቴ ዓሲ ዴዒ ዴዒ ዓኣነቴ ታ ዛጌኔ፤ ሃሣ
 ዩሱሴ ዛሎ"ና ያኦሲ ቃኣሎ" ኬኤዘሣ ዛሎ"ናሮ ጨንቾ ዓፓሮና
 ዋዶና ዓሶኮ ሸምፓሣ ታ ዴንቄኔ፤ ዔያታ ቦዓሣና ዒዛኮ ማላቶናም
 ዘጊባኣያ ሃሣ ዩያ ማላቶ ባሊታ ማዔቴያ ኩጫ ጌሣባኣ ዓሶኬ፤
 ዔያታ ሓይባ"ፓ ዔቂ ኪሪሰቶሴና ዋላ" ሺያ ለዔ ካኣታዳንዳኔ።

5 ዓቴ" ሓይቂ ዓሳ ጋዓንቴ ዩይ ሺዮ ሌዓ ጋፓንዳያ ሄላ"ንዳኣና
 ሃይባ"ፓ ዔቂባኣሴ። ዩና ቤርታሳ ሃይባ"ፓ ዔቂፆኬ። 6 ቤርታሳ
 ሓይባ"ፓ ዔቂፆ ዔቂዘንሣኒ ዓንጅ ዋዛ ዓኣያ፥ ሃሣ ያኦሲማኣ ዔያታ
 ዲማዴያኬ፤ ላምዓሳ ሓይባ" ዔያቶ ዋኦታንዳ ባኣዚ"ያ ባኣሴ፤
 ዔያታ ያኦሲና ኪሪሰቶሴናኮ ማዳ ቄኤሶ ማዒ፥ ኪሪሰቶሴና ዋላ"
 ሺያ ለዔ ካኣታዳንዳኔ።

ፃላሄኮ ያሎና ባሺንቲፆ

7 ዩና ሺዮ ሌዓ ጋፔሣኮ ጊንፃ ፃላሄ ቱኡዛፓ ቡሊ"ንታንዳኔ፤
 8 ዩካፓ ዒ ዓጮ" ቢያይዳ ዓኣ፥ ጎኦጌና ማኣጎኦጌ ጌይንታ ዴሮ"
 ዳቢሹ ያልዚሮዋ ዔያቶ ዔኪ ኬሰካንዳኔ፤ ዩያ ዴሮ"ኮ ፓይዳ" ባዘ"
 ዓጫ ዓኣ ማኣሻሎጉዲኬ። 9 ዔያታ ዓጮ" ቢያ ኬሰከ ዴንዳያ
 ያኦሲም ዲማዴ ዓሳ ናንጋ ጉርዶና ዒዚ ናሽካ ካታሜሎዋ ማንጌኔ፤
 ጋዓንቴ ጫሪንጫፓ ታሚ ኬዲ" ዔያቶ ሙዔኔ። 10 ዔያቶ ዳቢሹ

ፃላሄና በዓሢና ሃሣ ሉኡዙሞና የኦሲ ማሊያ ከኤዛያ ማላሢ ዓኣ ቤዘ፡ ፂኢሎ" ከሰኪ ዔኤታ ታሞ ባዘ"ይዳ ዔያታ ዓገንቴኔ፤ ዒኢካ ዔያታ ዋንቶንታ ሮኦሮንታ ናንገና ጋቸዋ ሜቶ ናንገ ናንጋንዳኔ።

ጋፒንያ ዋጎ

11 ዬካፓ ቦኦሬ፡ ዴኤፒ፡ ካኦቱሞ ያይታና ዬያ ያይቶይዳ ዴዒ ዓኣ ዓሲ ታ ዴንቄኔ፤ ዒማ"ና ሳዖና ጫሪንጮና ዒዛ ቤርታፓ ዓኣሺንቴኔ፤ ቤሲያ ዔያቶኮ ጴዲባኣሴ፤ 12 ዴኤፖንታ ዳኮ"ንታ ማዔ፡ ሐይቄ ዓሳ ካኦቱሞ ያይቶ ቤርታ ዔቄ ዓኣንቴ ታ ዛጌኔ፤ ዒማ"ና ማፃኣፔ ቡሊ"ንቴኔ፤ ሜሌ" ናንገ ማፃኣፔ ማዔ፡ ማፃኣፔያ ቡሊ"ንቴኔ፤ ሐይቄ ዓሳ ዒማ"ና ማፃኣፖይዳ ፃኣፒንቲ ዓኣ፡ ፔኤኮ ማደ" ጎይያ ዋጎ ዔኬኔ። 13 ባዘ"ይዳ ጌሊ ሙይንቲ ሐይቄ ዓሶ ባዘ" ከሲ" ዒንጌኔ፤ ሐይቢንታ ሃይቄ ዓሳ ናንጋ ቤዘንታ ዔያቶ ኮይላ" ዓኣ ሐይቄ ዓሶ ከሲ" ከሲ" ዒንጌኔ፤ ዬያይዲ ፔቱ" ፔቱ" ዓሳ ፔኤኮ ማደ" ጎይያ ዋጎ ዔኬኔ። 14 ዬካፓ ሐይቢንታ ሐይቄ ዓሳ ናንጋ ቤዘንታ ታሞ ባዘ"ይዳ ዓገንቴኔ፤ ዬይ ታሞ ባዘ" ለምዓሳ ሐይቦኬ፤ 15 ሱንፃ ናንጎ ማፃኣፓ ፃኣፒንቲ ጴዲባኣሢ ቢያ ታሞ ባዘ"ይዳ ዓገንቴኔ።

21

ዓኪ ጫሪንቹና ዓኪ ሳዓና

1 ዬካፓ ዓኪ ጫሪንቹና ዓኪ ሳዓና ታ ዛጌኔ፤ ዋይቲ ጌዔቲ ቤርታኣ ጫሪንጮና ቤርታኣ ሳዖና ባይቄሢሮኬ፤ ባዘ"ያ ባኣያ ማዔኔ። 2 የኦሲም ደማዴ ካታሜላ፡ ዓኮ ዬሩሳላሜ ዓኒም ሎዓኒ ፓልሚ፡ ገኢገንቴያ ማዒ የኦሲ ኮይሎ ጫሪንጫፓ ኬዳ"ንቴ ታ ዛጌኔ፤ 3 ካኦቱሞ ያይታ" ዓኣ ቤዛፓ፡- «የኦሲኮ ዋይያ ቤዛ ዓሶ ባኣካኬ፤ ዒዚያ ዔያቶና ዋላ" ናንጋንዳኔ፤ ዔያታ ዒዛ ዓሲ ማዓንዳኔ፤ የኦሲ ፔ ቶኦከና ዔያቶና ዋላ" ማዓንዳኔ፤ የኦዛሢያ ዔያቶኮ ዒዛ ማዓንዳኔ፤ 4 ሐሣ ዓቢያ ቢያ ዔያቶኮ ዓኣፓፓ ዒ ዑጫንዳኔ፤ ሐይቢ ማዔቲያ የደሢ፡ ዬኤፒ ማዔቲያ ሜታ ማይ ዔያቶኮ ባኣሴ፤ ዓይጎሮ ጌዔቲ ቤርታኣ ባካ ቢያ ዓኣዴኔ» ዴኤፒ ዑኡሲና ጋዓንቴታ ዋይዜኔ።

5 ዒማ"ና ካኦቱሞ ያይቶይዳ ዴዔሢ፡- «ዓካሪ፡ ታ ቢያ ባኮ ዓካሳንዳኔ» ጌዔኔ፤ ዬካፓ ሃሣ፡- «ሐይ ቃኣላ" ጉሙርቂንታያ፤ ገንሣ ጎኔ ማዔሢሮ ፃኣፔ» ታኣም ጌዔኔ። 6 ሃሣ ዒዚ፡- «ዓካሪ ቢያ ባካ

20:12 ዳኣኔ. 7፡9-10። 21:1 ዒሲ. 65፡17፤ 66፡22፤ 2ጴ፪. 3፡13። 21:2 ዒሲ. 52፡1፤ 61፡10፤ የሐ. የፔዳ 3፡12። 21:3 ሂዚ. 37፡27፤ ሌዊ. ዓኬ 26፡11-12። 21:4 ዒሲ. 25፡8፤ 35፡10፤ 65፡19።

ጋፔኔ! ዔኤቢኮ ቢያ ዓርቃሢና ጋፒሳሢና ታናኬ፤ ዴኤቢንቴሢሢም ናንጎ ዋኦይዳፓ ጪጎ ባኦዚ" ባኦንቴ፥ ጉሪ ታ ዒንጋንዳኔ፤ ⁷ ያሎና ባሽሢ ዬያ ቢያ ዴንቃንዳኔ፤ ታ ዒዛኮ ያሕሲ ማዓንዳኔ፤ ዒ ታኦኮ ናዖ ማዓንዳኔ፤ ⁸ ጋዓንቴ ዒጊጫ ዓሳ፥ ጉሙርቁዋ ዓሳ፥ ዒኢቴያ ማዔ ፑርቶ ዓሳ፥ ዓሶ ዋዳ ዓሳ፥ ማቾ ሃሣ ዓኒ ማዒባኦያና ላሃ ዓሳ፥ ማርሾ ማርሻ ዓሳ፥ ሜሌ" ያኦዞ ካኦሽካ ዓሶንታ ሉኡቃ ዓሶንታኮ ቢያ ዔያታ ጌላንዳ ቤዛ ዒኢሊ" ኬሰኪ ዔኤታ ታሞ ባዞ"ይዳኬ፤ ዬይያ፡- ለምዓሳ ሓይሶ"ኬ» ታኦም ጌዔኔ።

ዓኮ ዬሩሳላሜ

⁹ ጋፒንሢ ማዔ፥ ባይዛ ባኮ ላንካዎንሢ ኩንሃና ላንካዎ ዑዢ ዓንጎ ዔኪ ዓኦ ላንካዎ ኪኢታንቻንሢዳፓ ፔቴ"ሢ ታ ኮይላ" ሙካዖ፡- «ማራዒሢኮ ማቾ ማዓ፥ ዑኡቴሎ ታኔና ዳዋንዳኔ» ጌዔኔ። ¹⁰ ዓያና ጌኤሺ ማለሢ ጋሮ ታኦኒ ጌሊ ዓኦንቴ ዒዚ ፔቴ"፥ ዴኤፒ ዴካ ታና ዔኪ ዓኦዳዖ ያሕሲም ዴማዴ፥ ዬሩሳላሜ ካታሚላ ያሕሲ ኮይሎ፥ ጫሪንጫፓ ኬዳ"ያ ታና ዳዌኔ፤ ¹¹ ያኦሲኮ ቦንቻ ዒዞም ፖዓኔ፤ ዒዞኮ ፖዓ ሚርጌና ሚዛጳያ ማዔ፥ ዒያሰጲዴ ጌይንታ ሹጮጉዲ ኮሺ" ፖዓያ፤ ሃሣ ጌኤሺ ለማሌኤሺጉዲ ፖዓያኬ፤ ¹² ታጾ ለምዖ ጌሎ ካራ ዓኦ፥ ዴኤፒ ሃሣ ሹቹና ኬልቆና ዴ"ጌ ኬኤሌ" ዴሢ ዒዞኮ ዓኦኔ፤ ዬኖ ታጾ ለምዖ ጌሎ ካሮ"ይዳ ታጾ ለምዖ ኪኢታንቻ ዔቂ ዓኦኔ፤ ዒኢካ ሃሣ ታጾ ለምዖ ዒሰራዔኤሌ ፃጶ ሱንፃፃፃኦፒንቲ ዓኦኔ። ¹³ ዓባ" ኬሰካ ዛሎ"ና ሃይሃ ካራ፥ ኬዶ" ዛሎ"ና ሃይሃ፥ ድኦሎ" ዛሎ"ና ሃይሃ፥ ዓባ" ጌላ ዛሎ"ናኦ ሃይሃ ካራ ዓኦኔ። ¹⁴ ካታሚሎ ሹጮና ኬልቂ፥ ዴርቆና ዴዖኮ ዶዲሻኒ ዴማ" ጌሢ ማዢና ታጾ ለምዖ ሹቹ ዓኦኔ፤ ዬያቶ ዑይይዳ ማራዒሢ ማዶ"ም ዳኪንቴ፥ ታጾ ለምዖንሢኮ ሱንፃፃፃኦፒንቲ ዓኦኔ፤ ¹⁵ ዒማ"ና ታኦና ጌሰታ ኪኢታንቻሢ ካታሞንታ ካታሞኮ ጌሎ ካሮ"ንታ ሹጮና ኬልቂ ዴርቆና ዴዖዋ ዋርቆ፥ ዋርቆና ኮሺ"ንቴ ያዶሲ ዓንጊ ኮኦሎ" ዔኪ ዓኦኔ፤ ¹⁶ ካታሚሎኮ ያዶሎሞና ዳልጉሞና ያይዶ ዛሎ"ና ቢያ ሄኮ ማዔያኬ፤ ኪኢታንቻሢ ካታሚሎ ዬኖ ዓንጌሎና ዋርቃዛ ዒዞኮ ያዶሎማ ታጾ ለምዖ ሺያ ሚራፔ * ማዔኔ፤ ዒዞኮ ዳልጉሞና ዔጶና ዬኖ ጎይዖ ማዔኔ፤ ¹⁷ ኪኢታንቻሢ ሹጮና ኬልቂ

21:6 ዒሲ. 55፡1። **21:7** 2ሳሙ. 7፡14፤ ዓይኑ. 89፡26-27። **21:10** ሂዚ.

40፡2። **21:13** ሂዚ. 48፡30-35። **21:15** ሂዚ. 40፡3። * **21:16** ሚራፔ፡- ጌይዖ ሚናኦ ዋዶ"ና ዔኤቢኮ ያዶሎሞንታ ዳልጉሞንታ ዔጲንታ ዋርቂ ዒሮያ ማዓዛ ፔቴ" ሚራፔ" ፔቴ" ዔኤታና ሳሊ"ታሚ" ዶንጎ ታኦኪሢ ማዓያኬ።

ዲርቆና ዲያ ዋርቄኔ፤ ዋርቃዛ የዶሱማ ኪኢታንቻሢ ዋርቃ፤ ዔርቲ ዋርቆ ባኮና ጸኤታና የይዲታሚ" የይዶ ዋዳ ማዔኔ። 18 ዬይ ኮሾ"ና ኬኤሎ" ዲራ፤ ዒያሰጺዴ ሹጮና ኮሾ"ናያኬ፤ ካታሜላ ለማሌኤሽጉዴ ጌኤሺ ዋርቄና ማዦናያኬ፤ 19 ካታሜሎኮ ኬኤሎ" ዲያ ደዲሻንዳጉዲ ዴማ" ጌሢ ማዦና ሹጮ ዲማ ዲማ ሹጮና ቢያ ማይሊ ጌኢሺሽናያኬ፤ ቤርታሲ ዒያሰጺዴ፤ ላምዓሶ ሴንፔሬ፤ ሃይሣሶ ኬልቂዶኔ፤ የይዳሶ ሜሬጊዴ፤ 20 ደንጋሶ ሴርዴንክሴ፤ ላሃ"ሶ ሴርዲዮኔ፤ ላንካሶ ኪሪሰቶሎቤ፤ ሳላ"ሶ ቢሬሊ፤ ታዞጰሶ ዌራዊሬ፤ ታጰሶ ኪሪሰጺራሲሴ፤ ታጰ ፔታ"ሶ ያኪንቴ፤ ታጰ ላምዓሶ ዓሜቴሰዒሮ ጌይንታ ሹጮ ጌሢ ማዦናጌንቴያኬ። 21 ታጰ ላምዖ ካሮ"ይዳ ታጰ ላምዖ ሚዛጺ ሹቺ ዓኣኔ፤ ፔቴ" ፔቴ" ካራ" ፔቴ" ፔቴ" ሚዛጺ ሹቺና ማዦናጌንቴያኬ፤ ካታሜሎኮ ሳዞ" ዴኤፖ ጎይዖ ለማሌኤሽጉዲ ፖዓ፤ ጌኤሺ ዋርቄና ኮሾ"ናያኬ።

22 ቢያ ባኣዚ" ዳንዳዓ ጎዳ ማዔ ያኣዛሢና ማራዓሢና ዬኖ ካታሜሎኮ ጌኤዢ ማኣሮ ማዔሢሮ ካታሞይዳ ጌኤሺ ማኣሪ ታ ዴንቁባኣሴ። 23 ያኦሲኮ ቦንቾ ፖዓ፤ ዒዞም ፖዓሢሮና ሐሣ ማራዓሢያ ዒዞኮ ፖዓሢ ማዔሢሮ ካታሜሎም ዓቢያ ማዖም ዓገኒያ ፖዓንዳጉዲ ኮይሱዋሴ። 24 ዴራ" ዒዞ ፖዖና ሃንታንዳኔ፤ ሐሣ ዓጮ" ካኣታ" ፔኤኮ ዓኣ ባኮ ዒዞ ባንሢ ዔኪ ዬዓንዳኔ። 25 ዒኢካ ዳሚ ባኣያታሢሮ ካታሜሎኮ ካራ" ቢያ ዎዴ ዎዳንቲዎዎ ዴዓኔ። 26 ዴሮ"ኮ ዓኣ ባካ ቢያ ዒዞ ጋሮ ጌላንዳኔ፤ 27 ፑርታ፤ ሻኣካ ባኣዚ" ማዔያ ፔቴ"ታዖ ዒዞ ካታሜሎ ጌላዓኬ፤ ሃሣ ፔና ዒኢሳ ማዶ ማዳያና ሉኡቃ ዓሲ ፔቴ"ታዖ ዒኢካ ጌላዓኬ፤ ዒኢካ ጌላንዳዞንሢ ሱንዓ ማራዓሢኮ ናንሳ ማፃኣፖይዳ ፃኣፒንቴዞንሢ ሌሊኬ።

22

1 ዬካፓ ኪኢታንቻሢ ያኦሲና ማራዓሢኮ ካኣቲሞ የይቶይዳፓ ኬሰካ፤ ጌኤሺ ለማሌኤሽጉዲ ጌኤሽካ ናንጊ ዋኣሢ ዋርዚ ታና ዳዊኔ፤ 2 ዬይ ዎራሢ ካታሜሎኮ ሳዞ" ዓኣ ዴኤፖ ጎይዖ ጊዴና ዓኣዳያኬ፤ ዋርኮ ሻውሎና ሚዛቆናይዳ ዓገና ዓገና ዓኣፒ ዓኣፓያ፤ ሌዖይዳ ታጰ ላምዒ ማይንቲ ዓኣፓ ናንጊ ሚሢ ዓኣኔ፤ ዬያ ሚፃሢኮ ዒላዢ ዴሮ"ኮ ዴኤሻኬ፤ 3 ሐይካፓ ሴካ ማይ ጋዳማ

21:18 ዒ.ሲ. 54፥11-12። 21:23 ዒ.ሲ. 60፥19-20። 21:24 ዒ.ሲ. 60፥3።

21:26 ዒ.ሲ. 60፥11። 21:27 ዒ.ሲ. 52፥1፤ ሂዚ. 44፥9። 22:1 ሂዚ.

47፥1፤ ዛኪ. 14፥8። 22:2 ማዢ. ማፃ 2፥9፤ ሂዚ. 47፥12።

ባኪያ ማዕንዳኔ፤ ያሕሲና ማራዓሢናኮ ካእቱም ያይታ ካታሜሎይዳ ማዕንዳኔ፤ ዒዛም ማዳዘንሢያ ዒዛ ካእሸካንዳኔ፤ ⁴ ዒዛኮ ዓውካሮዋ ዒያታ ዛጋንዳኔ፤ ዒዛኮ ሱንፃኣ ዒያቶኮ ባለታ ፃኣፒንቴያ ማዕንዳኔ፤ ⁵ ዩካፓ ሴካ ደሚያ ደሚያ፤ ናንጊና ናንጋ ጎዳ ማዕ ያኣዛሢ ዒያቶም ፖዓንዳሢ ፖዒ ፖዓ ባኣዚ"ታቴያ ዓቢያ ዒያቶም ኮይሱዋያኬ፤ ናንጊና ዒያታ ካኣታዴ ጎይሣ ናንጋንዳኔ።

ዩሱሴኮ ማዒ ሙኪያ ዛላ

⁶ ዩካፓ ሃሣ ኪኢታንቻሢ፡- «ሃንሢ ጌይንቴ ባኮንሢ ጉሙርቂንታያ ሃሣ ጎኔኬ፤ ፔ ዓያኖ ዒዛ ማሊያ ኬኤዛ ዓሶም ዒንጋ ጎዳ ማዕ ያኣዛሢ ዳካ" ዋዴኮ ጊንፃፓ ማዕንዳ ባኮ ዒዛም ማዳዘንሢያም ፔጋሲ ዳዋኒ ፔኤኮ ኪኢታንቻሢ ዳኬ» ታኣም ጌዔ።

⁷ ዩሱሴ ታኣም ኬኤዛያ፡- «ታ ዑኬና ዩዓንዳኔ፤ ሐኖ" ማፃኣፖይዳ ኬኤዚንቴ ያሕሲ ማሊያ ካፒ፡ ማዲ ኩንሣሢ ዓንጃ ዋዛ ዴንቃንዳኔ» ጌዔ።

⁸ ሓያ ባኮ ዋይዜሢና ዛጌሢ ታና ዮሐኒሴኬ፤ ዩንሢ ታ ዋይዛያ ሓሣ ዛጋያ ዩንሢ ባኮንሢ ታኣም ዳዌ ኪኢታንቻሢም ዚጋኒ ዒዛኮ ቶኮ ዴማ" ሎኣሜ። ⁹ ኪኢታንቻሢ ጋዓንቴ፡- «ሐሽ"! ሓያይዲፖ! ታኣኒ ኔናንታ ኔኤኮ ጌርሲንሢንታ ማዕ፡ ያሕሲ ማሊያ ኬኤዛዘንሢና ዋላ"፤ ሃሣ ሓያ ማፃኣፓ ጌይንቴ ባኮ ካፓዘንሢና ዋላ" ማማዳያኬ፤ ያሕሲም ዘጊ ካእሸኬ» ታኣም ጌዔ። ¹⁰ ሓሣ ዒዚ ኬኤዛያ፡- «ቢያ ባካ ማዲንቴ ኩማንዳ ዋዳ" ዑኬያ ማዕሢ ሓያ ማፃኣፖይዳ ያሕሲ ማሊያና ኬኤዚንቴ ባኮ ዓሲም ዕርቱዋጉዲ ዓኣቲፖ፤ ¹¹ ዓካሪ፡ ፑርቶ ማዲሢ ፑርቶ ማማዴንጎ፤ ፔና ዒኢሳ ባኣዚ" ማዲሢ ማማዴንጎ፤ ዒላ"ሢያ ዒዒሎ"ንጎ፤ ያሕሲም ዴማዴሢያ ፔና ዴዴማሶንጎ» ጌዔ።

¹² ዩሱሴ ዒማ"ና ታኣም፡- «ታኣኒ ዑኬ ዩዓንዳኔ፤ ፔቱ" ፔቱ"ሢያም ፔ ማዴ"ጉዴያ ታ ዒንጋንዳ ባካ ታ ኮይላ" ዓኣኔ፤

¹³ ቤርታሳሢና ጋፒንፃሢና፡ ዒኤቢ ቢያ ዓርቃሢና ጋፒሳሢያ ታናኬ።»

¹⁴ ናንጎ ሚያ ዓኣፖ ሙዓኒና ካታሜሎ ጌሎ ካሮ"ና ጌላኒ ዳንዳዓያ ማዓኒ ማኣዓሢ ፔኤኮ ማሰኬዘንሢ ባለቲና ዓኣያኬ።

¹⁵ ጌኔ ማዴ ማዴይ፡ ማርሻ ማርሻይ፡ ዒኒ ሃሣ ማቾ ማዒባኣያና

22:3 ዛካ. 14፡11። **22:5** ዒሲ. 60፡19፤ ዳኣኔ. 7፡18። **22:11** ዳኣኔ.

12፡10። **22:12** ዒሲ. 40፡10፤ 62፡11፤ ዓይኑ. 28፡4፤ ዒር. 17፡10። **22:13**

ዮሐ. ያፒዳ 1፡8፤ 17፤ 2፡8፤ ዒሲ. 44፡6፤ 48፡12። **22:14** ማኸ. ማፃ 2፡9፤ 3፡22።

ለሃይ፥ ዓሲ ዋዳይ፥ ሜሌ" ያኦዞ ካኣሽካይ፥ ሉኡዙሞ ናሽካያና ሉኡቃ ዓሲ ቢያ ካታሜሎኮ ዙላ" ማዓንዳኔ።

16 «ታኣኒ፥ ዩሱሴ ሓያ ማርካቶ ማርካዳንዳጉዲ ታኣኮ ኪኢታንቻሢ ሸኢጲያ ማኣሮ ዓሶም ታዳኬኔ፤ ታኣኒ ዳውቴ ዜርሢ ሃሣ ፃጲኬ፤ ዩያጉዲ ታኣኒ ፖፖዓ ካሪሢ ዠኦኬኬ» ጌዔኔ።

17 ዓያኖ ጌኤዠና ዑኡቴሎና «ሙኬ» ጋዓኔ፤ ሓያ ዋይዛሢያ «ሙኬ» ጎዖንጎ፤ ዴኤቢንቴሢያ ሙኮንጎ፤ ዑሽካኒ ኮዓሢያ ቢያ ናንጎ ዋኦያ ዔኤቢ ጨጉዋዖ ጉሪ ዑሽኮንጎ።

18 ሃያ ማፃኣፖይዳ ፃኣፒንቴ ያኦሲ ማሊያ ዋይዛዞንሢያም ቢያ ታላታኔ፤ ያኦኒያ ሃያ ቃኣሎ"ይዳ ፔቴ" ባኣዚ" ቃሴ"ቴ ያኦሲ ሓያ ማፃኣፖይዳ ፃኣፒንቴ ባይሲንቶ ዒዛይዳ ቃሲ" ቃሲ" ሄሊ"ሳንዳኔ።

19 ያኦኒያ ሓያ ያኦሲ ማሊያ ኬኤዛ ቃኣሎ"ይዳፓ ፔቴ" ባኣዚ" ፓጨሴቴ ሃያ ማፃኣፖይዳ ኬኤዚንቴ ናንጎ ሚያ ዓኣፖና ያኦሲም ዲማዴ ካታሜሎናይዳፓ ዒዛ ሄላ"ንዳ ባኮ ያኦሲ ፓጨሳንዳኔ።

20 ሓንሢ ባኮ ማርካዳሢ፡- «ሂዮ፤ ታ ዑኬ ዩዓንዳኔ» ጋዓኔ።

ዓኣሜን፤ ጎዳ ዩሱሴ ሙኬ!

21 ጎዳ ዩሱሴኮ ኮሹሞ ዒንጊፃ ዒንሢ ቢያሢና ዋላ" ማዖንጎ፤ ዓኣሜን።

ጌሌዝ ማግኒት

The Holy Bible in the Maale language of Ethiopia, using Ethiopic script

copyright © 2015 The Word for the World International and The Bible Society of Ethiopia

Language: Maale

Translation by: The Word for the World

Contributor: Bible Society of Ethiopia

Maale New Testament

by Bible Society of Ethiopia.

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-12-29

PDF generated using Haiola and XeLaTeX on 11 Nov 2022 from source files dated 29 Jan 2022

bbcfb90a-3ae3-5452-983d-6c4c02375929